


KOMEKA KOSALELA NZAMBE

MOSALA KOZANGA ETE

ÉZALA MOKANO NA NZAMBE

 Bandeko batei, ná bino baninga oyo bozali kuna, nalobi ete ezali litómbe ya kozala awa na ntongo oyo. Ná kotalisama ya ndenge wana, ee, nayebi te ndenge nini nakosala mpo nákoka kobika kokokana na yango.

² Kasi tofandaki kuna mpe tozalaki kosolola, ná Ndeko Nolan, nandimi te ete nasíla kokutana na moto oyo azali mpenza (Biso nyonso tosálémá moto na moto na lolenge na ye, kasi na Nzambe yango moko.) lokola Ndeko Jack Moore, ah-ha, ee, azali mpenza . . . Ndeko Nolan auti koloba: “Uta nazali awa elongo na ye . . .” (wana nde bokilo na ye ya mobali), mpe ndenge ayekolá kolinga ye mpe komemia bwanya na ye mpe nyonso wana. Mpe wana, nakoki koloba “amen” na yango. Makambo mingi ya malamú . . . bantango oyo tolekisá elongo, ngai ná ye, ná Ndeko Brown, Ndeko Boutliere oyo azali awa. Bato malamú ya Nzambe, nalingaka bango mpenza na motema na ngai mobimba.

³ Na bongo, na—nazomona ete biso nyonso tozali kozonga bilenge te, ee, nazokanisa sikawa ntango oyo komona biso wana tozobongwana uta ntango eleki pene na mibu ntuku mibale wana tozalaki kokatisa bisobe, mpe nyonso wana elongo, wana tozalaki bilenge. Kasi koyeba ete Mboka moko ezali, epai wapi tokonuna ata moke te. Mokolo moko tokokutana lisusu kuna.

⁴ Lobi na mpokwa, ntango nazalaki kobima na eyanganelo, mwasi moko azalaki kuna nsima, alali na ememele ya babeli, mpe alobaki: “Ndeko Branham, eleki mibu mingi . . .” Nabanzi ete azalaki paralize. Alobaki: “Oyebisaki ngai . . .” Nabosani maloba mpenza ya mwasi yango, ezalaki likambo moko lokola boye, nazolikia ete nakoloba yango na ndenge ya mabe te. Alobaki: “Mpasi oyo nazalaki na yango ezalaki na ntina,” to eloko moko bongo, ete alingaki kobota mwana. Kasi akokaki kosósola te ndenge ekokokisama, mpo azalaki na lolenge wana.

⁵ Elenge mobali moko ya kitoko mpenza azalaki wana, alobaki: “Ngai nde mwana oyo abotaki.” Alobaki: “Ngai nde mwana oyo abotaki.”

⁶ Mpe makambo mingi esalemaki kobanda ntango wana, tozali ata na ntango te awa, ya kolobela yango nyonso. Tokosala yango na ngámbo mosusu.

7 Mpe eyanganelo ya Bato na Mombongo oyo, ngai nazali moto ya ebongiseli moko te, nabanzi ete bino nyonso boyebi yango, kasi ngai. . . Oyo nde etónga bobele moko oyo nayókanaka ná yango, nazalaka na kálati na yango, ezali. . . Bango bazalaka interdenominationel, bazali kaka bato na mombongo. Bazalaka litómba monene mpo na ngai ná lolenge ya lotomo oyo Nkolo, Tata na biso, asilá kopésá ngai. Ezali. . . ezali mpenza te ete nalingaka ebongiseli te; ezali kaka lotomo oyo epésaméli ngai, mpe soki natosi mbélá yango te, boye nakozanga nde botosi na Nzambe.

8 Mpe, nazali kokanisa, liboso mpenza ya kolongwa na Tucson, ntango mosusu bato mingi kati na bino bazalaki kuna, mokolo moko nazalaki koteya na Los Angeles, na eyanganelo na bango. Mpe ezalaki na. . . Natelemelaki mpenza ebongiseli, ntango mosusu mwa—mwa makasi koleka. Na—nakánaki kozala bongo te. Soki okani kosala makambo na nkanza, na bongo, nalingaki kozala moto ya bilongi mibale. Bosengeli kosala bongo te, te, oyo wana ezali kozanga limemia na moto. Kasi nasolokali na ntina na nzete oyo namonaki na lopango ya Ndeko Sharrit. Ebotaki lolenge ya mbuma pene na mitano oyo ekeseni. Mpe nalobaki: “Natikálá komona nzete ya ndenge wana te na bomoi na ngai.” Ezalaki. . . ebotaki ba-pamplemousse, ebotaki bandimo, ebotaki ba-mandarine, ba-tangelo, malala, nyonso ezalaki kobima na nzete yango moko. “Ee,” nalobaki, “na—nazososola mpenza yango te. Ezali nzete ya lolenge nini?”

“Ezali nzete ya malala.”

Mpe nalobaki: “Kasi, wana pamplemousse?”

Alobaki: “Iyo.”

Na—nalobaki: “Wana ezali ndenge nini?”

Alobaki: “Wana ebakami na nzete yango.”

Mpe nalobaki: “Oh, namoni.”

9 Alobaki: “Nyonso ezali na libota ya bandímo, mpe nzete nyonso ya libota ya ndímo ezalaka. . . ekoki kobakema.”

10 Nalobaki: “Nasosoli.” Bongo nabandaki kogánga mwa moke, boyebi, mpo nazalaka motema móto-móto mpe na komiyokayoka.

11 Boye, alobaki: “Likambo nini?”

12 Nalobaki: “Ee, nazalaki kaka kokanisa likambo moko.” Mpe nalobaki: “Sikawa, nalingi kotuna yo motuna moko.” Nalobaki: “Sikawa, na mobu ekoya, ntango ekobóta ba-feléle, malala, ba-tangelo, ba-pamplemousse, bandímo ekozala lisusu te; nyonso wana ekozala malala mpo esalemi na nzete ya malala, boye te?”

13 Alobaki: “Te, te. Te, etápe moko na moko ekobota mbuma na yango.”

14 Nalobaki: “Namoni.”

15 Boye, yango mpe nasepelaki na yango mpenza, mpo nazali... boyebi ete nazali na... na ntembe te nazalaka na diplome ya Hartford ná ba-université nyonso mosusu, boyebi. Boye—boye nazo... natalaka *ezalisami* malamumu, yango nde université ya malamumu koleka oyo natikalá komona: université ya Mokeli. Na bongo, soki natali yango malamumu, nazuaka mateya na ngai na lolenge oyo namonaka ezalisami kosala.

16 Mpe nalobaki: “Ee, esepelisaki ngai mingi mpenza.”

17 Alobaki: “Likambo nini?”

18 Nalobaki: “Nauti kokanisa likambo moko.”

19 Boye, mokolo yango, nazalaki koteya likoló na yango. Mpe nalobaki: “Sikawa, bomoni, ntango lingomba ebandaki, ezalaki... Yesu alobaki...” Nazalaki koteya Yoane 15. “Ngai nazali Mowiti, bino bozali bitápe. Mpe étápe nyonso oyo ekobota mbuma te ekokatama, ekozikisama.”

20 Mpe moto moko abundisaki ngai mingi mpo na yango, alobaki: “Omoni, ngai nazalaki kokanisa ete soki moto asili mpenza kotondisama na Molimo Mosanto mpe kobikisama, olobaki ete ‘bakoki lisusu kokabwana na yango te.’”

21 “Ezali ya solo.”

22 Alobaki: “Bongo oyo *wana*?”

23 Nalobaki: “Sikawa okomi kolobela likambo mosusu. Azali kolobela likambo ya kobota mbuma, likambo ya Mowiti te; Azali kolobela likambo ya kobota mbuma, kasi ya Bomoi te. Alobaki: ‘Ee, soki okati nzete yango, na bongo, ekokóla, ekobota mbuma.’”

24 Alobaki...

25 Mpe nalobaki: “Sikawa, bomoni, nzete oyo, ntango ebandaki, bango nyonso bazalaki mpenza Baklisto ya solosolo, ya Biblia. Na nsima, étápe moko eyaki, na nkombo Lutherien, Metodiste, Batiste, Presbiterien: ndimo mpe bongo na bongo.” Mpe nalobaki: “Bomoni, efulukaka na nkombo ya Boklisto, kasi e... Ezali kozua bomoi uta na Nzete wana, kasi ezali kobóta lolenge na yango moko ya denomination. Bomoni? Kasi,” nalobaki, “soki nzete ya malala wana etikali kobimisa yango moko étápe mosusu, ekobota malala lokola esalaki na ebandeli.”

26 Esalemaki ete moto moko afandaki wana, mokonzi ya monene... moko na bibongiseli ya minene koleka ya biso, ba-Pantekotiste. Nayebi te soki náloba yango ndenge nini mpo moto nyonso ásosola ete ezali likanisi na ngai te ete—ete ná—nátelemela bandeko mibali ná bandeko basi wana; ezali solo te. Bato basosolaka ngai mabe mingi, kasi nayebaka ntina te. Bomoni? Bato bakanisaka ete ngai nandimaka kutu te ete bato bakendeke na losambo. Yango ezali ba-kilometre millio mosika koleka na Bosolo. “Tosengeli koyangana, mpe koleka mingi wana tozali komona mokolo yango kobelemu.” Bomoni? Tosengeli kosangana na bomoko. Tokoki kozala te...

27 Soki nazalaki kofanda na engumba moko, mpe bazalaki na eloko te kaka na . . . ee, losambo moko boye (nalingi kotánga nkombo te), kasi ata lingomba nini, soki bandimaka kaka eloko moko, ete Yesu azali Nzambe, mpe nyonso oyo etikali ezali libunga, ngai nakokende na losambo yango. Soki nakoki kolia lipa ya mobimba te, na—nakolia eteni. Bomoni? Nakokende koyoka, kokumbamela Nkolo, mpe kotalisa Ye ete ngai nazali kosala eteni oyo ya ngai. Nakolinga Áyeba ete nazali na bomoi. Nazali—nazali . . . nakolinga ete bato nyonso báyeba ngámbo oyo ngai nazali. Nasanganaka ná Baklisto, mpo na kokumbamela mpe—mpe kosalela Nkolo kuna.

28 Kasi ezali mpasi mingi, ngai . . . ezaláká kotungisa ngai mingi mpenza, na bongo namonaki ete ata Nkolo na biso, bazalaki kososola Ye mabe na makambo ebele mpenza. Akokaki koloba likambo moko, kasi bango . . . basosolaki Ye mabe. Nabanzi ete esengeli kaka kozala bongo. Kasi baoyo bazali na bwanya bakososola. Bomoni? Biblia nde elobi bongo. Bakokanga likambo Yango.

29 Boye, na ntongo oyo, wana nazali koloba likambo oyo . . . Mpe nalobaki: “Sikawa, ba—bazali kobika na nkombo ya Boklisto, kasi bazali kobóta lolenge ya mbuma oyo esengeli te. Bazali na mbuma ya denomination. Basali eloko moko, mpe bazobika uta na yango, mpe kobika uta na Bomoi yango mpenza.”

30 Yango nde nazalaki komeka koloba lobi na mpokwa, ete molimo ekoki kobatisama na Molimo yango, kasi ozali na yo kaka Moklisto te. Bomoni? Ozali kobika uta na Bomoi yango moko, kasi mbuma okobóta nde ekotalisa oyo yo ozali. Bomoni? Ya solo. Bomoni? Bakoki kosala bikamwa nyonso, kobondela mpo na babeli, kobikisa babeli, kofungola miso, kobengana milimo mabe, mpe—mpe kosala makambo nyonso oyo, kobika mpenza uta na Bomoi moko oyo ezali na kati kuna, kasi ata bongo, ezali ndímo. Bomoni? Ya solo. “Na mbuma nde bokoyebama,” elobaki Yesu. Na bongo tomoni . . .

31 Bongo ntango nakitaki uta na etumbelo, mokambi monene oyo atelemaki, alobaki: “Alingaki koloba bongo te.” Alobaki: “Toyebi ete biso nyonso tobakámi na kati.” Ee, ezali ya solo ete tozali ya kobakama, tobákámi na mobimbi, ezali ya solo; kasi na Mowiti te. Na bongo, alobaki . . . abandaki, tóloba—tóloba, kosilisa ngai lopo mwa moke.

32 Mpe elenge mobali moko azalaki wana, nakanisi azali ndeko ya vedette moko ya cinema. Nkombio na ye Danny Henry, mpe azalaki elenge mobali ya Batiste. Ee, ayaki na etumbelo mpo na koyamba ngai, mpe alobaki: “Ndeko Branham, nazolikia ete oyo ezali kotúka te, kasi,” alobaki, “nabanzi ete ekoki kozala, tóloba, mokapo ya 23 ya Emoniseli.”

33 Mpe nalobaki: “Matondi.”

³⁴ Mpe abandaki koloba likambo mosusu, mpe abandaki koloba minoko ya sika, elenge mobali ya Batiste. Mpe ntango asalaki bongo, mwa—mwasi moko azalaki kuna, autaki awa na Louisiane, ayebaki koloba Français, mwasi moko ya nzoto minene, akomaki ndimbola na yango.

³⁵ Ee, na sima, elenge mobali mosusu afandaki kuna, ayebaki koloba Français, ye mpe akomaki likambo oyo alobaki. Bakokanisaki makomi yango, mpe nyonso mibale ezalaki ndenge moko.

³⁶ Na nsima, elenge mobali mosusu ya molai ná nsuki ya mosaka, oyo atelemaki kuna na nsuka, na Cafeteria Clifton, apusanaki wana. Alobaki: “Bólakisa ngai makomami yango. Nalingi kotala oyo ekomami.”

³⁷ Mpe nyonso misato ezalaki ndenge moko na ndimbola na yango. Azalaki molimboli ya ONU, molimboli ya Français. Mpe elobaki boye:

Lokola oponi nzela ya nkaka mpe ya moke, nzela ya mpasi mingi, olandi nzela oyo yo moko oponi . . .

Kasi ozui mokano ya nkembo mpenza, mpo ezali NZELA NA NGAI.

Bomoni? Mpe elobaki . . . ekobaki mpe elobaki:

Oyo, na yango moko, nde eloko oyo ekokokisa, mpe ekosala, ekomema mpe ekosala ete elónza monene mpenza ékokisama kati na Bolingo ya Nzambe.

³⁸ Bomoni, ntango nyonso, ata na Francais, verbe ezalaka liboso ya adverbe na—na—na ndimbola yango. Boye, na oyo wana nakokaki te koloba . . . Mose aponaki, asengelaki kopona. Bisó nyonso tosengeli kopona mpe kosala makasi nyonso mpenza. Mpe Nzambe . . . Namemiaka nsango ya moto nyonso, oyo apesina ntina na Nzambe. Ngai . . . ézala nini, namémiaka yango na motema mobimba.

³⁹ Sikawa, namoni elenge ndeko mobali moko auti koya kala mingi te, Ndeko Stringer, nakanisi auti na Louisiane . . . to na Mississippi, amemeli biso bafotó moko awa, oyo bomonaki biso kotaláká yango. Ezalaki ya Mwanje na Nkolo, ntango Amonanaki. Bato boni bayoká lisolo yango? Nabanzi bino nyonso awa boyoká yango. Boyokaki yango na bande, mpe nyonso wana.

⁴⁰ Sikawa, bayebisaki ngai yango na ntongo moko, na ngonga ya zomi, wana nazalaki na eteni ya ndako na ngai, na Indiana. Elobamaki na ngai ete nakozala na Tucson, ekozala na ntongo-ntongo, nakozala kolongola nzube (kuna tobengaka yango motó ya ntaba) na lokolo ya pantalon na ngai. mpe Banje nsambo bayaki, na lokito makasi, mabelé epasukaki mpe nyonso mosusu, na . . . mabanga ezalaki kokweya longwa na bangomba, mpe Banje nsambo batelemaki wana.

41 Mpe nalobaki: “Ee . . .” Nayebisaki mwasi na ngai, azali awa esika moko, na ntongo oyo: “Bongisa makambo nyonso mpo moto akoki ata moke te kobika na likambo yango,” nalobaki, “ábima na bomoi na yango. Nazokende na Tucson, mosala na ngai esili awa na mokili. Nazozonga na Ndako mpo na kokutana ná Nkolo Yesu.”

42 “Ee,” alobaki, “ondimisami mpenza?”

43 Nalobaki: “Iyo. Iyo, moto moko te akoki—akoki koyikela yango mpiko. Ekoki kosalema ata moke te.”

44 Nautaki koteya *Bileko Nsambo Ya Lingomba*. Na ntango wana nde nabengaki ndeko na biso ya mpiko, elenge Ndeko Jack Moore, mpo nátuna ye likambo oyo, na ntina na Yesu, na Emoniseli 1, oyo azalaki kuna ná nsuki ya mpembe mpe nyonso wana.

45 Nalobaki: “Azalaki elenge Mobali.” Mpe na ntango yango nde emoniseli eyaki, ete oyo wana ezalaki nde perruque, kasi Ye te; Alati perruque (mpe nakokaki kososola yango te), lokola Bonzambe ya Likoló koleka. Mpe bazúzi ya kala bazalaki kosala bongo, na Yisraele, basengelaki kozala na nsuki ya mpembe. Mpe mpembe elakisaka bopeto. Mpe bazúzi ya ba-Anglais, kino lélo oyo, na bisambiselo ya likoló koleka ya Angleterre, balataka perruque ya mpembe ntango bakotaka, mpo mobeko mosusu ezali te, likoló na oyo ya bango, na mokili. Bomoni? Mpe bazalaka bazúzi ya likoló koleka.

46 Mpe nazoyeba lisusu nakendeki kuna na Arizona, mpe nyonso wana, nasalaki makasi mpo. . . Nabangaki mingi mpenza. Nakendeki na liyangani ya Phoenix. Mpe boyebi lisusu, nateyaki liteya oyo: *Misié, Ezali Ntango Nini?* Bozoye yango lisusu? Nalobaki ete nautaki komona yango, nalobaki: “Liboso ékokisama, bómikanisela, YANGO ELOBI NKOLO, ‘Likambo moko elingi kosalema.’” Ntango mosusu bozali na ba-bande yango na bisika bobómbaka ba-bande na bino sikawa. Mpe kuna nalobaki: “Bóbosana te sikawa, bimononeli yango ezángaka kokokisama te. ‘Likambo moko elingi kosalema.’ Bómikanisela!”

47 Mpe mwa mikolo nsima na yango, nabandaki kokóma na motema likolólikoló, mpe namilobelaki: “Likambo nini oyo? Nalingi kokúfá? Soki. . . Nabanzi ete ekosalema noki-noki, mpo nákoka koleka yango. Nalingi te ete éumela.”

48 Mpe na ntongo moko, Nkolo alobaki: “Matá likoló na Sabino Canyon.”

49 Mpe nazalaki kuna na likoló, natombolaki maboko, kobondeláká. Nayokaki eloko moko etuti loboko na ngai. Ezalaki mopángá. Sikawa, bokoki kokanisa ndenge okoki komiyoka, wana ozali kuna yo moko, mpe omoni mbeli moko na loboko na yo, ya molai *boye*. Nakitisaki yango mpe natalaki yango. Ezalaki mpenza mbeli, moko na ba . . . kútu ngai

nabangaka mbeli. Mpe ezalaki na—ezalaki na—na ebende moko, eloko moko lokola bambeli oyo, lokola ebende oyo basangísá na acier to eloko moko bongo, ná mopotu mpenza mpe moke. Ezalaki na eloko ya kobatela loboko ezinga yango *awa*, oyo babundi bazaláká kolata, mpo kobatela kozokisana maboko, mpe—mpe ezalaki na mayaka awa na esimbeli. Efandaki malamu na loboko na ngai. Ee, napangusaki miso mpe natálaki na nsima.

Bobele na esika yango mpenza, mokolo mosusu, namonaki mwa ebengá moko ya mpembe ekiti wana. Nakoyebisa bino na ntina na yango nsima.

⁵⁰ Mpe nasimbaki yango na loboko, namilobelaki: “Eza ndenge. Sikawa, Nkolo, ngai. . . nabandi libómá? Moto moko te azali awa. Nazali mosika mpenza na bato nyonso, kasi mopánga yango oyo. Natombolaki loboko, kasi euti wapi?” Mpe namilobelaki: “Ezali mpenza likambo ya ndenge. Sikawa, yango oyo, ezali mopánga.” Bomoni, nabetaki yango boye, ezalaki mpenza mopánga. Nalobaki: “Moto ata moko te atelemii awa. Nazali na likoló ya mabánga oyo, na sóngé ya ngomba mpenza.” Mpe okokaki ata komona Tucson te, uta na esika yango, etikalaki mpenza mosika na nsé.

⁵¹ Namilobelaki: “Sikawa, wana ezali likambo moko ya ndenge. Sikawa, esengeli kozala ete, na esika moko boye, mpembi awa, Moto moko, oyo akokaki kokela mpe kosala mopánga, mpe kotia yango na loboko na ngai.” Nalobaki: “Ekoki bobele kozala Nzambe mpenza, oyo akelaki mpate ya mobali mpo na Abraham, oyo akelaki biséndé wana,” oyo bosílá koyoka. Mpe nalobaki: “Matiere yango oyo, ezali na lolenge misato ya matiere kati na yango, mpe nasimbi yango na loboko na ngai mpenza, lokola eloko mosusu nyonso oyo nakoki kosimba na loboko na ngai.”

⁵² Mpe nayokaki Mongongo moko, elobaki: “Oyo wana ezali Mopánga ya Mokonzi!”

⁵³ Mpe namilobelaki: “Sikawa, Yango euti wapi? Ezalaki na esika moko boye kuna, na kati ya mabanga wana.” Nasimbaki yango na loboko ndenge *wana*, mpe nalobaki: “Mopánga ya mokonzi moko.” Mpe natalaki zinga-zinga, mpe mopánga yango elimwaki. Nalobaki: “Mopánga ya mokonzi moko.” Ezali mpo na . . . bakómisaka moto chevalier ná—ná mopánga, nabanzi ezali bongo, na mampinga to na lolenge moko boye, bakómisaka moto chevalier ná yango, boyebi. Mpe nalobaki: “Ee, ntango mosusu ezalaki nde na ntina wana. Elingi koloba, ntango mosusu, ete nasengeli kotiela batei maboko, to eloko moko ndenge wana, mpo na kokómisa bango batei.” Na bongo na . . .

⁵⁴ Mongongo moko elobaki lisusu, elobaki: “Mopánga ya Mokonzi *mpenza!*” Ya mokonzi *moko* boye te; Mopánga ya Mokonzi *mpenza!* Bomoni?

55 Namilobelaki: “Sikawa, to nabeli libómá, mayele na ngai ebúlúngání, to likambo moko ezali kosalema, moto moko azali awa pembeni na ngai.”

56 Mpe bandeko, makambo oyo ezali solo. Na—nayebi te ndenge nini koyebisa bino yango, bomonaka yango ntango nyonso, kosalema ntango nyonso bongo. Mpe ezali. . . Nazalaki kosósola yango te. Boye. . . Ezali liyoki moko ya ndenge mpenza.

57 Mpe natelemaki wana. Namilobelaki: “Sikawa, Moto oyo asololaka na ngai na bomoi na ngai mobimba, kobanda bobebé na ngai, azali awa, kasi nazali komona Ye ata moke te.” Nalobaki: “Mopánga ya Mokonzi *mpenza?*” Wana ekozala. . . Nzambe nde azali Mokonzi *mpenza*. “Kasi mopanga oyo ezali nini?”

58 “Liloba, Etiami na loboko na yo.” Alobaki: “Kobanga liwa te, ezali nde lotomo na yo.”

59 Oh, la la! Nakitaki uta na ngomba yango, nazalaki kolela, koganga makasi mpenza, kopumbwa likoló na mabanga. Nakendeki koyebisa mwasi na ngai, nalobaki: “Nakokufa te, omoni, ezali—ezali—ezali nde lotomo ngai.” (Nayébisáki ye ete áyá awa ná Billy Paul, mpe ámema bana. Nalobáki: “Sikawa, ngai nazali na eloko moko te, kasi lingomba ekosala ete bókufa nzala te, mpe nyonso wana, mpe nako—nakokutana na yo na ngámbo mosusu.”) Mpe—mpe ye. . . Nalobaki: “Te, nakokufa te, ezali nde likambo moko na ntina na lotomo na ngai.”

60 Mwa mikolo nsima na yango, nazalaki kobima na liyangani moko; nayambáki telegramme moko ya nkasa misato, eutaki awa na Houston, na Texas. Mpe mobali oyo asílísáká ngai loposo na mpokwa oyo bakangáki Mwanje na Nkolo fotó, bakangaki Ye fotó kuna na Houston, abengaki ngai, alobaki. . . atindaki nde telegramme, mwasi na ye alobaki: “Nayebi, Ndeko Branham, ete ozali na mosala mingi. Mwana na ngai ya mobali (mwana ya ndeko mwasi ya Ted Kipperman) azali na molongo ya baoyo bakobomama na kíti ya lótilíki.” Alobaki. . . (Bongo soki ezalaki Billy Paul?) Alobaki: “Ye ná elenge mwasi moko basengeli kobomama.” Mpe bino nyonso botángaki yango na zulunále, na ntembe te. Mpe alobaki: “Elikia bobele moko oyo totikali na yango, ezali ete óyá kosala mayangani mpo na kosangisa bato.”

61 Mpe Raymond Hoekstra asíláká kokomela ngai mbala mingi, kasi boyebi, nasílaki kobongisa ete nsima na mayangani wana, kokende bokila elongo na Mr. Mc Anally ná bamosusu. Mpe namilobelaki: “Ee, soki natiki ete bana wana bábobomama mpe nasali makasi te, nakokoka lisusu kokende bokila te.”

62 Bongo, nalobaki: “Malamu, nakoya.” Nayaki na Houston, nasalaki mayangani yango mpe, na ntembe te. . . batikálá koboma bango te, kaka. . . bakatelaki bango etúmbu ya bolóko mpo na bomoi na bango mobimba. Mpe yango nde eloko oyo balingaki ete básala, bákatela bango kaka etúmbu ya bolóko

mpo na bomoi mobimba. Na bongo, eleki mibu pene na ntuku mibale na moko, nabanzi, na—na Texas.

⁶³ Bongo, na bozongi, namataki na ngomba yango, nakendeki elongo ná Ndeko Fred Sothmann. Azali awa esika moko. Ndeko Fred, ozali wapi? Awa. Ndeko Fred Sothmann, Ndeko Gene Norman; mokolo moko, na mokolo ya mibale oyo tozalaki kuna, Mwanje na Nkolo akitaki kino na moláko, esika oyo tozalaki, mpe abandaki kolobela makambo ya bana na bango, mpe makambo oyo bazalaki kosala.

⁶⁴ Nalongwaki wana mpe nazongaki likoló na ngomba yango. Nasilaki kozua mwa ngulu na ngai ya zamba, mpe nazalaki kolanda mosusu ákima na ngámbo ya Ndeko Fred. Na bongo, namonaki esika bazalaki kolia, na mopanzi ya ngomba, mpe nalobaki: “Ee, sikawa, bóyoka ndenge nakosala, Ndeko Fred.” Nalobaki: “Sikawa, yo okokende likoló ya sóngé wana, lobi na ntongo.” Tolingaki kokende kuna na ntongo-ntongo, komata likoló na ngomba. “Okokende kuna na ntongo-ntongo, ngai nakomata na ngámbo mosusu. Sikawa, ngai nakobeta masasi ata na moko te, kasi soki bayei epai boye, nakobeta masasi liboso na bango mpo na kozongisa bango. Yo pona oyo ya monene.”

⁶⁵ Alobaki: “Malamu.”

⁶⁶ Bongo, Ndeko Fred akendeki kuna. Mpe Ndeko Gene Norman (Nandimi te ete Ndeko Gene ayaki, boye te?), ye azalaki—azalaki na ngámbo mosusu. Mingi kati na bino bayebi Gene Norman, moninga malamu mpo na bato mingi, ndeko malamu. Mpe akitaki na mwa nsé. Nzokande, bangúlu yango bazalaki kuna te na ntongo wana. Mpe nazalaki komona Ndeko Fred, kopepa ye loboko, azalaki na ntáká ya kilometre pene na moko na ndambo kolongwa na ngai. Ee, namilobelaki: “Bakei mpenza wapi?” Nakitaki na kati ya libulu moko ya monene, nakómaki na nsé, namilobelaki: “Nakotala soki nakoki komona esika bazali.” Nabandaki lisusu komata. Ntongo eutaki kotána, moi eutaki kobanda kobima.

⁶⁷ Nalekaki pembeni-pembeni ya libulu moko ya monene mpenza, oh la la! ya métre nkama na nkama, mabanga ya minene mpenza ezalaki kuna, na kati ya ngomba yango, ná bitutú ya minene wana. Mpe ezalaki kokóma mwa . . . moi ezalaki kobima, na bangonga ya nsambo, nabanzi, to pene na yango. Nafandaki mpe nazalaki kotala zinga-zinga, esalemaki ete nakitisaki miso na lokolo ya pantalon na ngai, mpe namonaki nzúbe yango, nzúbe. Mpe nalobaki: “Oyebi, ezali komonana ndnege. Boyebi, Mwanje na Nkolo ayebisaki ngai ete nakozala na ntáká ya kilometre pene na ntuku motoba na mitano na nord-est ya Tucson, nakobanda kolongola ba-nzube na lokolo na ngai.” Bozomikanisela yango? Boye te? Iyo, misie. Bomoni? Nalobaki: “Ezali ndenge.” Nasimbaki yango.

68 Mpe kaka ntango natombolaki miso, namonaki bangúlu ya zamba pene na ntuku mibale na ntáká ya metre nkama mitano na esika nazalaki, bautaki kobima mpo na kolia mwa matítí ya be-de-grue, mpe bafandaki. Nalobaki: “Sikawa, soki bobele nakoki kozua Ndeko Fred mpe komema ye kino na sóngé wana, akozua ngúlu na ye na mbala moko. Kasi nayebi ete azali na ntáká ya kilometre pene na mibale to misato na esika nazali sikawa. Na bongo,” nalobaki, “soki nakoki kokatisa likolo na mwa sóngé wana kozanga ete bámona ngai, kuna na likolo, pembeni na nzete ya genevrier wana,” nalobaki, “soki nabaluki na ngámbo oyo, ezali na nzela moko ya bambúli ekiti na ngámbo yango, nakoki komata kuna mbangu mpo bámona ngai te. Mpe nakokanga mwa eteni ya papier awa mpo náyeba moko na banzela ya kobimela mpo nákita uta na likoló ya canyon yango, nakosala ete Ndeko Fred ákóma wana na ntango malamú mpenza.”

69 Nabwakaki mwa nzube yango na nsé, nabosanaki Likambo yango. Mpe nabandaki komata ngomba yango malembe mpenza, natalaki na nsima, bamonaki ngai te, nakitaki mbangu mpe nakómaki na nzela oyo ya bambúli. Nalataki ekoti monene ya moindo. Nabandaki komata canyon yango na mbangu mpenza, mpe esalemaki.

70 Mabelé mobimba eninganaki, bisika nyonso. Mabanga ya minene *boye* ezalaki kokweya, putulú komata *boye*. Natalaki, mpe namonaki Banje nsambo batelemi liboso na ngai; ndenge ezalaki mpenza. Namiyokaki lokola natelemaki mosika likoló na mabelé. Ya liboso, nakanisaki ete moto moko abetaki ngai masasi, boyebi, lokola nalataki ekoti ya moindo wana; nakómaki lokola mwa ngúlu ya zamba, ata bongo, boyebi ete bazalaka moindo. Nakanisaki ete moto moko abetaki ngai masasi, ezalaki. . . pembeni mpenza. Bongo na—namonaki oyo yango ezalaki. Ee, kaka ntango. . . Nazuaki etinda na ngai, kati na Makomi: “Bilembo Nsambo, oyo ezali mabombami nsambo.” Bomoni?

71 Moto moko alobaki na ngai, alobaki: “Sikawa. . .” Oh, alobaki: “Ee, sikawa, mokolo moko, ntango mosusu Nkolo (lokola omonaka bimononeli, Ndeko Branham) akomonisa yo ntina ya makambo oyo, mpo biso nyonso tókoka kobeleva na Nzambe koleka mpe tózua nguya mingi koleka oyo tozali na yango na kolobáká minoko ya sika mpe nyonso wana.”

72 Nalobaki: “Ekoki kozala bongo te.”

73 Mpo, bomoni, ngai nandimaka ete Liloba ezali Solo. Mpe Biblia elobi: “Moto nyonso oyo akobakisa liloba moko to akolongola Liloba moko na Yango.” Esengeli kozala kati na Liloba oyo. Bomoni? Ezali mabómbami oyo bato bakokaki komona yango te, mpamba te kuna nde epai Liteya na ngai ya *Momboto Na Nyoka* mpe Kondima ya solo ya kobatelama ya mondimi eútá.

⁷⁴ Nazali kokitisa lokumu ya bandeko na ngai ba-Presbiterien te, ná bandeko mosusu kati na bino ba-Batiste, na ndenge bozuelaka kobatelama. Nazali koloba yango te mpo na kozala ndenge mosusu, kasi bosósólaki yango mpenza malamumu te. Bomoni? Ya solo. Bomoni? Kasi, ngai mpe nazalaki na libunga na likambo yango. Kasi soki Mwanje moko auti na Likoló mpe ayebisi yo yango, mpe ezuami mpenza wana kati na Makomi, Wana ezali solo. Bomoni? Ya solo. Bomoni, Alobaka ntango nyonso kokokana na Makomi.

⁷⁵ Kuna, nazalaki kotala yango malamumu kino ntango zolongano yango emataki likolo, ebandaki komata, mpe ekómaki lokola póle ya kokamwisa, lokola londendé. Kaka ndenge . . . Bato boni bamóná fotó na Yango, oyo bakangaki na Houston? Pene na bino nyonso. Bomoni? Ee, nde ndenge wana mpenza ezalaki. Ebongwanaki mpe ekómaki ndenge moko, Ekóbaki bobele komata se komata likoló koleka.

⁷⁶ Nazalaki kopota mbangu-mbangu mpenza, koluka Ndeko Fred ná bamosusu. Nsima na mwa ntango, pene na miniti ntuku misato na nsima, namonaki ye kuna na nse, kopepáká maboko na ye; mpe Ndeko Gene azalaki koya ákopepáká maboko. Bayebaki ete likambo moko eutaki kosalema. Na nsima, nakutanaki na bango. Ndeko Fred ye wana, afandi *kuna*.

⁷⁷ Wana ezalaki komata, nayebaki te ete ba-observatoire mpe nyonso wana, kino na Mexique, bazalaki kokanga yango fotó. Zulunále *Life* etalisaki yango ndenge Ezalaki komata. Mpe mingi kati na bino . . . Zulunále *Life*, oyo etalisaki fotó na Yango, yango oyo. Eloko moko ya libombami awa, mpe balobaki ete bayebi te esika nini eutaki; ezali na likoló mingi koleka. Ezali likoló na misándá nyonso ya mipepe mpe nyonso mosusu, oyo ekoki . . . Ezali likoló mingi mpo londende ésalema, mpo ezali na bosándá ya kilometre ntuku minei na mwambe, mpe na bonene ya kilometre ntuku minei na misato, ntango ekómaki na bosándá wana. Bobandú kutu ezali te to eloko moko te ezalaka kuna, bomoni.

⁷⁸ Mpe bakanisaki ete mpépo moko; boye balukaki-lukaki na bisika nyonso, bampépo emataki likolo mokolo yango te. Bomoni, basengeli koluka-luka, mpo matalatála ná nyonso wana ekoki koningana. “Mpépo moko te ezali kuna likolo.” Yango oyo awa, na zulunále, elobi likambo yango moko. Mpe—mpe ekóbaki se kokóba. Mpe lelo, na kati mpenza ya . . .

⁷⁹ Yango oyo na zulunále ya *Science*, bango mpe bazali kosósola te. Bayebi te soki Ezali nini.

⁸⁰ Na Tucson, na université, moninga na ngai moko akendeki kuna mokolo mosusu mpe azalaki kosolola na bango na ntina na yango. Balobaki: “Tokoki kosósola te nini . . .”

⁸¹ Nalobaki: “Bóloba eloko moko te, ekosunga te. ‘Bóbwáka biloko na bino ya motuya liboso na ngúlu te.’” Bomoni? Ezali

mpo na Lingomba, mpo na Baponami, baoyo babengami kobima. Bomoni?

⁸² Na bongo moto nyonso azalaki koya, koloba: “Ndeko Branham, namoni fotó na yo awa. Namoni eloko *boye*. Ngai. . .” Boyebi ndenge ezalaka. Kasi ko—kobendana molai wana, lokola oyo ndeko oyo azali na yango awa, epai. . . Bólimbisa ngai. Bótala ndenge Ebandaki komata, kobendana. Na bosolo, oyo ezalaki na ngámbo ya mobali. Mpe bino nyonso bozali komikanisela ete nalobaki: “Mwanje oyo amonani koleka azali oyo asololaki na ngai, azalaki na ngámbo ya mobali,” ata liboso ékokisama. Bozómikanisela? Mapapú na ye ezongaki nsima *boye*. Ezali mpenza mapapú ya Mwanje yango ntango ezalaki komata. Bomoni, ntango e. . . Boye babandaki kokanga bafotó, mpo ezalaki mpenza libombami. Kasi fotó ya nsuka, ntango Esalemaki yango moko na mapata, mpe bongo na bongo, yango oyo, ndenge zulunále *Look* etalisaki yango awa. Bomoni ndenge ezali komata, kaka ntango babandaki komona yango, bomoni. Mpe bakangaki fotó ya—ya solosolo, ya motuya mpe ya nsuka, ntango esalemaki.

⁸³ Bayebi te esika euti, to esika ekendeki, bayebi naino te. Science ezali mpenza kati na mobulungano, eyebi te likambo nini esalemaki. Kasi biso toyebi: “Bilembo ekomonana na likoló.” Toyebi yango. Bomoni? Mpe Alakaki makambo oyo. Bomoni? Mpe ntina bobele moko oyo bato bazuaki nzela ya kokanga. . .

⁸⁴ Sikawa, nayebi ete tozali biso na biso awa, na ntongo oyo. Soki nasíla kopesa bino, bandeko mibali to bandeko basi, likanisi ete ngai nayebi nyonso, nasengi na bino bólimbisa ngai. Nakani kozala bongo te. Ngai oyo. . . nazali awa na ntongo oyo, koloba liboso na bato oyo batángá mingi, bato oyo bazali na mayele mingi; Na—natángá te, nakokaka ata kotángá biteni ya Makomi na ngai malamau te. Nazali na mokapo moko ya kotángá na ntongo oyo, naza. . . nalingaki kosenga na moko na bandeko awa átángela ngai yango, mpo ngai nazokaka ata kotángá bankombo ezali kati na yango te, Ntango ya Liboso 13, (nasengi na yo, Ndeko Jack, okoki koluka yango), lokola motó ya liteya na ngai. Na—nazokoka ata kotángá bankombo yango te, natiki ye ásala yango, mpo ye akoki kotángá yango.

⁸⁵ Mpe nayebi ete nazosolola na bato ya mayele mingi. Kasi, bandeko, makambo oyo ezali kosalema mpo bókokota kotálaka boínga na ngai te, kasi mpo bóndima ete nazoyebisaka bino Solo. Nzambe nde azoyebisaka bino Solo. Yango ezali Solo. Bomoni?

⁸⁶ Sikawa, mpe ntango nalobelaka ba-denomination, nalingi koloba te ete bózala na nkanza mingi mpe. . . Te, nalingi koloba te ete bókendeke na ba-losambo na bino te. Bókendeke na ba-losambo na bino, bósalaka oyo bosengeli kosala. Kasi nde, bómibakisaka ná bibongiseli wana te, mpamba te mokolo moko,

nakoyebisa bino mpe nakotalisa yango polele na nzela ya Makomi, ete ezali elembo na nyama. Pe bómikanisela yango, ezali elembo yango.

⁸⁷ Nateyaka . . . Nakolinga koteya yango na losambo ya Ndeko Jack te, akoyebisa ngai: “Kende liboso mpe sala yango”; kasi nakokende na tabernacle, ekozua pene na ngonga minei mobimba. Mpe motó ya liteya na ngai ezali: “Nyama na ebandeli mpe nyama na nsuka, na nzela ya matambe ya nyoka.” Bomoni? Ekozua pene na ngonga minei. Nazali na Makomi oyo esili kobongisama. Nyama, uta na ebandeli, azalaki nyama na elanga ya Edene, azali nyama na nsuka, mpe nakotalisa ete azali moto oyo asambelaka mpe denomination (ye moto asalaki denomination); mpe koya mpenza na nzela na matambe yango, mpe nakotalisa bino yango na nzela ya Makomi ete ezali bongo. Nayebaki yango te kino Molimo Mosanto ápesa ngai yango mokolo mosusu, na likoló kuna.

⁸⁸ Sikawa, mpo na oyo, nazalaki kolandela yango mokolo moko, nazalaki ya kotelema, mpe Eloko moko elobaki na ngai . . . nazalaki kotala yango, mpe namilobelaki . . . Ndeko Hickerson, moko na bayangeli-misolo na ngai . . . to moko na basungi ya losambo ya Jeffersonville . . . Soki nandimaka likambo ya kokende na losambo te, mpo na nini nazali na losambo? Na mpokwa mosusu, tozalaki kolanda na telephone ná bango nyonso na ekólo mobimba, na kilometre nkama misato nyonso elandi, moko na ba-losambo na ngai ezalaki.

⁸⁹ Sikawa, fo—fotó oyo, nazalaki ya kotelema, kotaláká yango, mpe Eloko moko . . . Natelemaki na chambre na ngai. Eloko moko elobaki: “Balólá yango na ngámbo ya mobali.” Nayokaki yango.

⁹⁰ Nayebi ete ezali komonana lokola moto oyo motó na ye ezali kosala malamú te, kasi, bomoni, ndenge nalobaki na mpokwa mosusu, makambo ya minene nyonso oyo ya mayele mingi . . . Sikawa, natelemelaka yango te. Bómikanisela, tosengeli kotinda bana na bino na kelasi mpo bátánga mpe bongo na bongo, kasi nalobi na bino sika-sikawa ete ekosunga bango na eloko moko te na mokili oyo ekoya, mpo ekozala civilization mosusu, ya mosika mpenza koleka, likoló na oyo. Civilisation yango ekozala ata te na . . . Ekozala na biteyelo moko te kati na yango, ekozala na kúfa te kati na yango, ekozala na lisumu te kati na yango. Oyo ezali na nyonso wana; ata tokómi ba-civilizé ndenge nini, kufa ezali kokoba kobakisama ntango nyonso. Bomoni? Oyo wana ekozala na kufa te. Kasi sikawa, tosengeli kokende na kelasi, tosengeli kolata bilamba, to . . .

⁹¹ Na ntongo oyo, nalingaki koteya likoló na *Edene Ya Satana* (mingi kati na bino bazali na bande na yango), *Edene Ya Satana*. Asili kosala elanga ya Edene mosusu, mpe ezuaki ye mibu nkóto motoba mpo na kosala yango, kaka ndenge Nzambe asalaki oyo

ya Ye na ebandeli. Nzambe asalaki Edene na Ye, mpe Satana abebisaki yango. Sikawa Satana asali Edene na ye moko, mpe Nzambe akobebisa yango (ya solo) mpe Akotia oyo ya Ye moko.

Eloko moko elobaki na ngai: “Balólá yango na ngámbo ya mobali.”

Namilobelaki: “Nakanisi nazotala yango malamumu.”

Elobaki: “Balólá yango na ngámbo ya *mobali*.” Bomoni?

⁹² Namilobelaki: “Ntango mosusu Mongongo yango elingaki koloba nábalusa yango *na ngámbo ya mobali*.” Mpe ntango nasalaki yango, bomoni oyo yango ezali: *Motó ya Klisto* ya Hofmann, na mibu ntuku misato na misato. Awa, bótala awa, bomoni mandefu na Ye ya moindo, elongi na Ye, miso na Ye, zólo na Ye, mpe makambo mosusu nyonso. Bomoni ndelo oyo ekaboli nsuki na Ye awa, na likoló. Mpe Alati perruque ya mpembe, esalemi na Banje, mpo na kotalisa ete Nsango ya Ye ete azali Nzambe ezali Solo. Azali Zúzi Mokonzi ya molóngó, Zúzi Mokonzi ya Likoló ná nse. Azali Nzambe, mpe eloko mosusu te, bobele Nzambe. Azali Nzambe oyo atalisami na lolenge ya moto, oyo abengami Mwana na Nzambe, elingi koloba Mwana azalaki Moto. Mpe soko yango ezali kotalisa te ete Nsango na biso ezali mpenza ya solo: etalisami polele na Makomi, etalisami polele na mosala, etalisami polele na Bozali na Ye, motindo moko lobi, lelo mpe libela. Na yango Bilembo Nsambo wana ezali Solo, bandeko. Okoki kozanga kondima yango, kasi fanda naino mpe yékola yango na motema polele ntango moko, tika ete Molimo Mosanto ákamba yo uta na . . .

⁹³ Awa, ntango Ndeko Jack . . . nabengaki ye liboso náteya oyo mpe nasololaki na ye mokolo moko na ntina na “Perruque ya mpembe wana ezalaki nini?”

⁹⁴ Alobaki: “Ee, Ndeko Branham, nalobi ete wana ezalaki oyo ya Ye . . . ezalaki nsima na lisekwa na Ye, na nzoto na Ye ya nkembo.” Nazalaki kosolola ná Ndeko Jack. Mpe ezali na . . . nayebi moto moko te na mokili mobimba, oyo nakolinga kotiela motema, na oyo etali malakisi na bango na ntina na theologie mpe nyonso wana ndenge nakolinga Ndeko Jack Moore mpe Ndeko Vayle, mpe bato ya—ya ndenge wana, ba—theologiens ya solosolo, oyo batángá ba—búku ndenge na ndenge, ná komonela ya kokesana ya ndenge nyonso. Ee, kasi, bomoni, ata na oyo wana, mpe ata azali moninga na ngai ya motema, na—na—nakokaki mpenza kondima yango te, ezalaki na eloko moko wana, oyo esimbaki te.

⁹⁵ Na bongo ntango oyo eyaki, bongo nde namonaki oyo yango ezali. Mandefu na Ye ya moindo, yango oyo. Bomoni Yango, nabanzi. Bomoni? Mandefu ná nsuki na Ye ya moindo, miso na Ye, zólo, nyonso, yango mpenza, mpe ata ndelo oyo ekaboli nsuki na Ye, koya awa, na ngámbo oyo. Azali Nzambe! Bomoni? Mpe Azali ndenge moko lobi, lelo mpe libela. Mpe oyo ezali

zulunále *Look*...to zulunále *Life*. Nakanisi ete oyo ezali... sikawa, nabosani mokolo oyo ebimaki; oh, mokolo ya zomi na nsambo, na sanza ya Mitano, na mobu 1963. Nde ntango ebimaki, soki moto moko azali na mposa ya zulunále yango. Fotó yango ezali na zulunále oyo batii Rockefeller ná mwasi na—na ye na mokongo na yango. Mpe oyo ezali zulunále ya sika ya *Science*, elobi ete “ezali naino libombami.”

⁹⁶ Mpo na nini nalobi makambo oyo? Mpo ékoka kopesa bino mwa likanisi ya makambo oyo tozali komeka koloba, oyo Nzambe azali kotalisa polele na likoló mpe na nsé, ete ezali solo. Kosósola makanisi, bimononeli oyo, tozali na bamekola mingi mpenza, tozalaka na bango ntango nyonso. Kasi bóbosana te, liboso dollar ya lokuta ézala, dollar ya solosolo esengeli naino kozala; liboso, dollar ya solosolo esengeli kozala, na nsima, yango esalemaka uta na yango. Kaka ndenge tozalaki na Mose ya solo ná Alona ya solo, bongo tozalaki na Yambele ná Yanesi nsima na bango. Bomoni ndenge nyonso wana elandanaka? Bamonaka yango, na nsima bamekaka komekola yango, nzokande oyo ya ebandeli ezalaka na bosolo bobele *moko*. Ya solo. Nazali koloba yango te mpo na koyokisa mpasi, to kotiola, to kokósela moto likambo, kasi bobele mpo na Solo; mpo na koyeba ete ngai...

⁹⁷ Nabandi kokóma mobange, mpe nayebi ete natikali lisusu na ntango molai te. Soki Yesu aumeli, nakoki... nakoki kozala naino mwa moke; kasi nayebi ete mokolo moko, motema oyo ekobeta mbala ya nsuka, mpe nakokota na chambre moko ya monene mpe ya molili, kuna, oyo babengi kufa. Kasi ntango ngonga yango ekokoma, naboi kozala na eloko moko oyo nasengeli kotala na nsima mpo na yango, koluka kobongola motema mpo na yango. Ntango nakokóma na ntango yango, nalingi kozala peto mpe kozanga mbindo, na nzela na ngolu na Nzambe. Nalingi komizipa na bilamba ya boyengebene na Ye, ntango nakokota kuna, ná eloko bobele moko oyo na likanisi na ngai: Nayebi Ye na nguya ya lisekwa na Ye; mpe ntango Akobenga, nakobima longwa na bakufi mpe nakozala na bomoi elongo na Ye mpo na libela. Mpe yango nde ntina na ngai ya kozala awa sikawa, ya koluka kosala ete moto nyonso... mpo na kobongola theologie na bino to eloko moko te, kasi mpo na komatisa kondima na bino na bilaka ya Nzambe ya mokolo oyo.

Sikawa tóbóndela:

⁹⁸ Nzambe molingami, tozali bato oyo tozali kozongisa matondi na ntongo oyo, kasi ata bongo, Nkolo, tozali kobika na mokili moko ya molili, oyo... Ezali ata na moto moko te kati na biso, awa, na ntongo oyo, Tata, oyo azangi komiyoka ete to—tolingi kotambola pene na Yo koleka, tolingi ko—kosimbama na Yo wana na bomoi na biso, oyo ekoki kokómisa biso petepete ná makoki ya kobongwana mpo Ókoka kobongola biso na ntango nyonso, kopesa biso lolenge ya bana na Nzambe, ya mibali mpe ya basi.

Yango—yango nde mwango na biso ya kozala awa, Tata, yango nde—yango nde ntina bobele moko oyo nazali na yango, ezali koluka ko—kobika liboso na Yo mpe kozua Liloba na Yo mpe kozongela koloba Yango na mibali mpe basi oyo. . . ezali te mpo na kozala moto ya ndenge mosusu, kasi koluka kopesa lokumu na Ye oyo apesi ngai Bomoi. Sála yango, Nkolo.

⁹⁹ Tika ete moto moko te ázala awa, lelo. . . To—to soki. . . Bazali lisusu kolanda biso na nzela ya telephone, na ntongo oyo, na ekólo mobimba. Tika ete moto moko te, oyo azali koyoka mongongo na biso, ásengela kokota na chambre monene wana kozanga koyeba Yo na nguya na Yo ya lisekwa. Soki basumuki bazali esika moko, na ekólo mobimba, oyo. . . to na losambo oyo, na eyanganelo monene oyo, baoyo bafandi awa na ntongo oyo. Soki bato bazali, oyo bayebi Yo te, tika ete oyo ézala mokolo oyo lisósoli na bango ekoningsama, ekolamuka, mpe bakososola ete bayebi te na miniti nini tokoki kobengama to kozua mbéla ya koyanola mpo na bomoi na biso, na Likoló. Mpe soki nkombo na biso ezali naino na buku wana ya mobimbi, tokokweisama; kasi soki ezali na Buku na Bomoi ya Mwana-mpate, Bomoi ya solosolo, na bongo, tobikisami.

¹⁰⁰ Mpe tika ete, Nkolo, wana Bomoi yango ezali kotambola longwa na lokasa kino na putulú ya feléle, kino na mposho, bongo kosuka na mbuma, wana tozali koleka, na ntongo oyo, soki ezali na Bomoi moko oyo esengeli kokota na mbuma, mpe ezali naino kati na mobimbi wana, bimisa yango lelo, Nkolo, tika ete élanda epai mbuma ezali kokende, mpo tosengi yango na Nkombo na Yesu. Amen.

¹⁰¹ Bólimbisa ngai ndenge nazui ntango mingi boye. Nabosanaki ete ezali kozua ntango na radio, kuna, ntango na telephone.

¹⁰² Sikawa, tózua mpo na litánga na biso. Ndeko Jack, ozali na Biblia na yo awa? Wana nazali koluka Likomi na ngai, nakosenga na Ndeko Jack ete átánga Likomi yango, mpo ngai nakoki kotánga bankombo oyo te. Malamu. Ezali na Ntango ya Liboso 13. [Ndeko Jack Moore alobi: “Mokapo mobimba?”—Mok.] Iyo.

[Dawidi alukaki toli epai na mikóló na nkóto mpe na mokámá mpe na bakambi nyonso.]

[Dawidi alobaki na koyangana mobimba ya Yisalaele ete, Soko emonani malamu epai na bino, mpe soko ekoki liboso na Yawe Nzambe na biso, tótinda bandeko na biso bipai nyonso, baoyo batikali na mikili nyonso na Yisalaele, mpe elongo na bango epai na banganga mpe Balewi na mboka na bango mpe na bilanga pembeni, ete báyangana epai na biso.]

[Tóyeisa mpe lisusu epai na biso sandúku na kondimana na Nzambe: mpo ete to—tobosanaki yango na ntango na Saulo.]

[*Koyangana mobimba bandimaki kosala bongo: mpo likambo ezalaki sembo na miso na bato nyonso.*]

[*Bongo Dawidi ayanganisaki Yisalaele mobimba, longwa na Siholo na Ezipito kino na ekotelo na Hamata, ete báyeisa sandúku na Nzambe longwa na Kilyata-yalima.*]

[*Dawidi mpe Yisalaele mobimba babutaki na Baala, epai na Kilyata-yalima oyo na Yuda ete bálóngola wana sandúku na Nzambe oyo ebiangami na nkombo na Yawe, ye oyo afandi kati na bakelúba.*]

[*Bakumbaki sandúku na Nzambe kati na likalo na sika longwa na ndako na Abinadaba: Uza mpe Ahio batambolisaki—batambolisaki likalo.*]

[*Dawidi mpe Yisalaele mobimba basepelaki liboso na Nzambe na nguya nyonso na bango, na nzembo mpe na bibetelo-na-nsinga minene, mpe na bibetelo-na-nsinga mike mpe na nzenze mpe na bilonza mpe na mindule.*]

[*Ekómaki bango na etutelo-na-loso na Kidono, Uza asembolaki loboko na ye mpo na kosimba sandúku; mpo bangombe babetaki libaku.*]

[*Nkanda na Yawe epelelaki Uza mpe abetaki ye, mpe mpo ete atii loboko na ye na sandúku: akufaki wana liboso na Nkolo.*]

[*Dawidi ayokaki mabe mpo Yawe abimelaki Uza: esika yango ebiangami ete, Pelese-Uza kino lelo oyo.*]

[*Dawidi abangaki Nzambe na mokolo yango, ye ete, Nakoki nde koyeisa sandúku na Nzambe epai na ngai na nzela nini?*]

[*Boye Dawidi ayeisaki sandúku epai na ye moko na mboka na Dawidi te, kasi apengwisaki yango kino na ndako na Obede-edome, Mogiti.*]

[*Sandúku na Nzambe efandaki na ndako na Obede—Obede-edome sanza misato. mpe Yawe apambolaki ndako na Obede-edome mpe nyonso ezalaki na ye.*]

¹⁰³ Matondi, Ndeko Moore, mpo na kotanga Likomi mpo na ngai. Sikawa, bólimbisa ngai nakokaki kotánga yango ngai moko te, kasi na—nakokaki kosala yango te.

¹⁰⁴ Sikawa nalingi ete bózua elongo na ngai Malako 7:7, tokotánga milongo nsambo ya liboso, ya Santu Malako, mokapo ya 7.

Bafalisai mpe bamosusu na bakomeli uta Yelusaleme bayangani epai na ye.

Mpe ntango ye amoni ete bamosusu na bayekoli na ye balei na maboko na mbindo, ntina na yango ete maboko masukolami te.

Kasi Bafalisai mpe Bayuda nyonso soko basukoli maboko te...baliaka te, boye bazali kotósa—kotósa mibeko na mikóló.

Mpe elongwaki bango na zándó, bakoliaka te soko bamipetoli te. Mpe makambo mosusu mingi oyo ezalaki—ezalaki bango...oyo bazuaki uta na... bazuaki, ...lokola likambo na kosukola bakopo, mpe bambeki, mpe basani ya motako, mpe bamesa.

Bongo bafalisai ná bakomeli batuni ye ete, Mpo na nini bayekoli na yo bakotambolaka na nzela na mibeko na mikóló te, kasi bakoliaka lípa na loboko na mbindo?

Ye nde alobi na bango ete, Ee, Yisaya asili asakolaki malamú na ntina na bino bakosi, lokola ekomami ete, Bato oyo bakumisaka ngai na bibebu na bango kasi mitema na bango ezali mosika na ngai.

Bakosanzolaka ngai mpamba, bakolakisaka malako mazali mibeko na bato.

Tóbóndela.

¹⁰⁵ Nzambe molingami, kumisa Liloba na Yo sikawa, mpe tika ete Ékokisa ntina oyo Yango epesamaki. Sálela biso lokola bisalelo mpo na koloba Yango, mpe matoi na biso mpo na koyoka Yo koloba, mpe mitema na biso mpo na koyamba Yango. Tosengi yango na Nkombo na Yesu, mpo na nkembo na Nzambe. Amen.

¹⁰⁶ Sikawa, liteya na ngai, mpo na ntango moke, ezali oyo... Na...

¹⁰⁷ Bazali kolanda biso na ekólo mobimba, na nzela ya telephone, na ntongo oyo. Mpe nasosoli ete moninga na ngai malamú, Roy Borders, azali koyoka, azali na mwa motungisi na ntina na oyo esalemaki lobi na mpokwa. Nabosanaki ete tozalaki koloba na radio...to, lobi na mpokwa, bazalaki kolanda biso na telephone. Roy, esika nyonso ozali, ózala na losambo, kuna na San Jose, to na losambo ya Ndeko McHughes, to esika nyonso ozali, kobanga te, ndeko na ngai, nyonso ekotambola malamú. Fándá kimia, bobele...Akoyebisa ngai yango, Roy; komitungisa te, mwana, zala na kondima na Nzambe.

¹⁰⁸ Motó ya liteya na ngai, na ntongo oyo ezali: *Komeka Kosalela Nzambe Mosala Kozanga Ete Ézala Mokano Na Nzambe.* Sikawa, ezali motó ya liteya moko ya ndenge, kasi natii motema ete Nkolo akopesa biso emoniseli na yango sikawa. Bóbosana te: “Komeka kosalela Nzambe mosala kozanga ete ézala mokano na Nzambe.” Sikawa, ezali komonana mpenza ndenge. Kasi, na oyo, ntango mosusu Nzambe akoki kosunga biso.

¹⁰⁹ Likambo mosusu nakolinga koloba na ntongo oyo, ezali ete tozali na esengo ya koyamba kati na biso moninga na ngai, moninga ya motema mpenza, elenge mobali moko. Mingi kati na bino baoyo bozali kolanda na radio sikawa, bokoki, to, na

nzela ya telephone, boyebi ezali nani yango. Lelo ezali mokolo ya mbotama na ye, akokisi mibu ntuku libwa na misato, Ndeko Bill Dauch, afandi awa liboso na ngai, mibu ntuku libwa na misato.

¹¹⁰ Eleki mibu ebele, monganga alobaki: “Akoki kobika te.” Nauti komona ye ete afandi awa sikawa. Azalaki kopéma na bombóne, mpe mwasi na ye, mwasi malamú, abengaki ngai mpe alobaki: “Ndeko Branham, soki olingi komona mobange moninga na yo, Bill, na bomoi, ekozala malamú óyá sika-sikawa.”

¹¹¹ Mpe ngai. . . Moko na bapiné na ngai epasukaki na pembeni, lokolo ya motuka na ngai eutaki kobeba, mpe napasolaki piné moko ya motuka na ngai, koluka kokende kotala ye. Nautaki kobima longwa na—na—na pómpi moko, pómpi ya essence, nautaki na zongo, na esika oyo nasilaki kotelemisa motuka, na Ohio, wana nazalaki koluka kokóma epai na ye, mpe nakobimáká, namonaki emononeli. Namonaki Ndeko Dauch, ateleme na kati ya losambo mpe asémboli loboko; ebongwanaki, mpe namonaki yo ozali kotambola na balabala mpe opesaki ngai mbote ya loboko. Alobaki: “Kende koyebisa ye: ‘YANGO ELOBI NKOLO.’”

¹¹² Azalaki pene na mibu ntuku libwa na ntango wana. Asalaki crise cardiaque, motema na ye etelemaki, mpe motema etikaki mpenza kobeta. Monganga ya mayele mingi. Moto yango azali te. . . alingi te. . . Te, nakoloba yango te. Azali bobele moto oyo akoki kofuta monganga nyonso oyo alingi. Azalaki na monganga moko malamú ya Moyuda, oyo akutanaki na ngai na couloir mpe alobaki: “Azali na libaku malamú ata moke te ya kobika.”

¹¹³ Nakotaki mpe nakotisasi loboko na kati ya héma ya bombone, nalobaki: “Bill, ozali koyoka ngai?” Andimaki na motó. Nalobaki: “YANGO ELOBI NKOLO: ‘Okokufa sikawa te.’”

¹¹⁴ Mpóso moko nsima na yango, ntango namataki na eteyelo mpo na koteya Nsango na ngai, tala Ndeko Dauch ye oyo kotamboláká kati ya eyanganelo. Mpe ntango nakendeki na Restaurant Furr, na ngámbo. . . nalingi koloba Blue Boar, na ngámbo mosusu na Louisville, tala ye oyo azobima na motuka mpe kotamnola na balabala, asémbolaki loboko; kokokana mpenza na Liloba na Nkolo. Mpe wana eleki mibu misato to minei; mpe tala ye oyo awa, ayei kino awa na Shreveport (akatisi ekólo mobimba, na mpépo te, na motuka nde), iyo, afandi awa na ntongo oyo. “Mbotama elamu, Ndeko Dauch.” Wana euti na ekólo mobimba, longwa bipai nyonso “Nzambe ápambola yo!”

¹¹⁵ Nabatisaki ye, nsima na ye kozala Trinitaire, nabatisaki ye ntango a. . . ezalaki moko na mayangani na ngai ya liboso, Ndeko Banks Wood asengelaki kodefisa ye bilamba na ye (azali moto ya nzoto minene, ndenge bozali komona), akotaki na mai ya libatisi mpe nabatisaki ye, na mibu pene na ntuku mwambe

na mitano to ntuku libwa, na Nkombo na Nkolo Yesu. Alobaki ete atikálá komiyoka malamumu ata te, kino azuakii kobatelama wana ya eloko moko, Na nsima ayambaki mbotama na esika oyo akokómáká lisusu mobange te. Ya solo, na Mboka ya nkembo wana. Akómi kutu kobika na elikia ya komona Boyei na Nkolo; ekoki kosalema. Kasi soki akolala, a . . . soki biso tozali na bomoi na ntango wana, ye akoya liboso. Ya solo. Boye, Ndeko Dauch, okoki kozanga yango ata moke te sikawa. Ozali mpenza na molongo. Tikala wana, ndeko na ngai, mpe Nzambe ápambola yo. Natondi Nkolo mpo na moto malamumu ndenge wana, mpe mpo na kopesáká ye mibu nyonso oyo.

¹¹⁶ Na Buku ya Ntango: “Komeka kosalela Nzambe mosala kozanga ete ézala mokano na Ye.” Nzambe azali na bonsomi, liboso, tolingi kososola yango. Lelo, bato bazali komituna mpo na nini tokoki kozua kolamuka te. Bondimaka ete Nzambe azali na bonsomi? Bomoni, Biblia elobi bongo.

¹¹⁷ Kasi biso tozali komeka . . . Ndenge nazalaki kosolola ná etóngá moko ya bandeko na ngai ya malamumu, bandeko ba-Batiste, kala mingi te awa, balobaki: “Ndeko Branham, tokoki kozua kolamuka bobele ntango tokamati Liloba, liloba moko na moko, lokasa moko na moko, nkoma moko na moko.”

¹¹⁸ Mpe nalobaki: “Ngai mpe nandimaka lokasa moko na moko.” Alobaki . . . Nalobaki: “Bamekaka kosala yango bandá kala.”

¹¹⁹ Alobaki: “Kasi tosengeli koluka ndimbola ya Liloba na lokóta ya Greki, oyo lokóta ya Greki elobi.”

¹²⁰ Nalobaki: “Natángi mingi mpenza te, kasi ntango natángaki lisolo ya lingomba, mpe *Likita Ya Nicée*, ná *Likita Liboso Ya Nicée*, *Ba-tata Ya Nicée* mpe bongo na bongo, na eleko wana, bazalaki kowélana na ntina na lokóta ya Greki. Wana esalemaki eleki mibu nkóto mibale. Moko alobaki: ‘Elingi koloba oyo,’ mosusu alobi: ‘Elingi koloba wana. Liloba ya Greki elingi koloba oyo.’”

¹²¹ Kaka lokola lokóta na biso; liloba oyo see. [Na Anglais *See* elingi koloba: komona—Mok.] Soki osaleli liloba oyo see, ekoki kolakisa “mai na mbu,” “nasósoli,” to makambo mingi. *Bored*, ekoki kozala “kotobola lidusú, kotambola,” to—to “olembisi ngai,” to “ofutelaki ngai mbongo ya bilei,” to ekoki kolakisa ata . . . makambo mingi. Mpe ba-voyelle ya mike wana, mpe bongo na bongo, ebóngolaka ndimbola mobimba. boye bokolóngá yango ata moke te, ndenge wana. Nzambe nde akomaki Yango bongo, mpo . . .

¹²² Mpe Liloba mobimba epesámí na mpémélá, mpe Alobaki ete: “Natondi Yo, Tata, Obómbi makambo oyo na miso ya bato na bwanya mpe ya mayele, mpe Okomonisa yango” (amen) “epai na bana mike, oyo balingi koyekola.” Ezali emoniseli ya Ye, ndenge nalobaki lobi na mpokwa: “Okomonisa Yango na bana mike.”

¹²³ Nalobaki: “Ekosimba te, misie.” Nalobaki: “Kolamuka ekoya ata moke te soki Nzambe, Nzambe ya bonsomi, atindi yango te; lisusu, Akoki kozua mwa moto moko ya mpamba, oyo ayebi ata kokoma nkombo na ye te, mpo na kosalela ye, oyo ayebi ata Anglais malamau te, lokóta ya Greki kútu koloba te.”

¹²⁴ Yango nde Asálaki, ntango Petelo ateyaki na Pantekote, boyebi, ayebaki ata kokoma nkombo na ye te, moínga mpe atángá te. Kasi Nzambe asalaka makambo na ndenge ya kokamwa mpenza mpo na makanisi na biso ya mayele ya bongó. Yango nde esalaka Nzambe. Soki Ázuaka etónga ya ba-theologien ná bato na lokumu, mpe bongo na bongo, balingaki koloba: “Kaifa, moto na mayele wana, bomoni, ye moto azalaki koloba solo.” Kasi Nzambe akitaki mpe azuaki balóbi-mbisi oyo bayebaki ata kokoma nkombo na bango te, mpe baoyo wana nde Ye azuaki. Oyo wana nde Nzambe, Azuaka eloko ya mpamba, mpe Abimisaka eloko moko uta na yango mpo na lokumu na Ye Moko. Azuaki mobúlungano mpe Akómisaki yango Edene. Iyo, ezali Nzambe.

¹²⁵ Sikawa, soki ezali na moto moko, oyo azali na ba-mecanique mpo na kolamuka, ezali ndeko na biso ya lokumu, Billy Graham. Kasi ba-mecanique ezali mabe te, kasi ba-mecanique ekotambwisa yango te, ba-dynamique esengeli kozala mpo na kotambwisa yango. Okoki kosala motuka, kotia bakiti ya kitoko na kati, kosala ba-piston ya malamau mpenza mpe—mpe kotalisa na nzela na zebi nini ekoki kosala; kasi soki ba-dynamique ezali te, ezali bobele ebembe ya motuka.

¹²⁶ Boye, na kolamuka ya Pays de Galles, moko na ba-kolamuka na biso ya nsuka, liboso na oyo ya ba-Pantekotiste na biso, moto moko te ayebaki nini ebandisaki kolamuka yango, kaka mwa etónga ya bato.

¹²⁷ Sikawa, ntango tosangisi nyonso...moninga na biso, Billy Graham, asangisi ba-Presbiterien, ba-Lutherien ná ba-Pantekotiste nyonso, mpe mangomba nyonso elongo, akei na engumba moko, mpe basali mayangani minene ya bato nkóto na nkóto, mpe bato nkóto ntuku misato bayei (na mpóso mibale) mpe bapesi mitema na bango epai na Klisto; tozongi kuna nsima na mpóso mibale, ata moto moko te atikali. Bomoni, wana ezali mecanique. Kasi soki Nzambe, na ngolu na Ye ya bonsomi, asololi na mwa moto moko ya mpamba, ndenge balobaka, moto moko azángá ntina; Akitisi Molimo na Ye na engumba yango, mpe mibali bakoki kokende na mosala te, basi bakoki kosukola basáni te, mwana-mosala akoki kobongisa mbeto te, bazali koganga mpe kolela, wana batomboli maboko. Yango nde kolamuka, yango ezali kati na mokano na Nzambe.

¹²⁸ Elobama ete bato moko ya lokumu mpenza ya lingomba bakendeki na Pays de Galles mpo básosola, to mpo báyeba malamau nyonso oyo etali mecanique ya kolamuka, na eleko ya

kolamuka ya Pays de Galles. Ntango bakitaki na masuwa, ná bikoti na bango ya milai, mpe bilamba na bango ya nkíngó zero, bamonaki mwa policier moko kokita na balabala, azalaki kobalola-balola ngondó na ye *boye*, wana azalaki ko-siflé, balobaki: “Moninga malamú, okoki koyebisa ngai esika nini kolamuka ya Pays de Galles ezali?”

¹²⁹ Alobaki: “Iyo, bandeko na ngai, bokómi mpenza na katikati na yango!” Iyo, Iyo, Iyo. Alobaki: “Bososoli, *ngai* nazali kolamuka ya Pays de Galles,” alobaki, “mpo kolamuka ya Pays de Galles ezali na kati na ngai.”

¹³⁰ Wana nde bonsomi! Wana nde oyo Nzambe asalaka, mpe bobele Ye nde azali na makoki ya kotinda kolamuka. Ezali likambo ya kosangisa mecanique te, ezali likambo ya kobóndela Nzambe mpo átinda dynamique—dynamique.

¹³¹ Amonisaka Liloba na Ye bobele na baoyo babongisámá liboso. Sikawa, ntango nasalelaka liloba oyo *kobongisama liboso*. . . Sikawa, ezali liloba moko elongobani te mpo na koloba yango liboso na bato, koleka mingi ntango tozali na bato ya ndenge na ndenge, ba-Arminien ná ba-Calviniste. Mpe ezali te. . . Nayebisaki bino ete bókanisa te ete ngai nayebi nyonso, kasi bango nyonso mibale bazali na libunga yengebene na Makomi. Ngolu ezali oyo Nzambe asálá mpo na ngai, misala ezali oyo ngai nasalaka mpo na Ye. Bomoni? Na ntango wana, ozali na Yango. Soki omati na etápe moko to mosusu, na ntembe te, okomona ete okómi na nsuka ya etápe yango, mpe okoki lisusu kozonga nsima te. Mokanda ya Baefese nde esangisaka nyonso wana, nakanisi.

¹³² Sikawa, kasi liloba oyo, *kobongisama liboso*, ntango nasalelaka yango, bókanisa te ete nazali. . . yango nde liloba bobele moko oyo nayebi ndenge ya ko—kosala ete. . . Ezali makoki ya Nzambe ya koyeba makambo liboso, bomoni, mpo Ayebaki. A—Akoki te koloba. . . A—Akufaki mpo bato nyonso bákoka kobikisama, Asalaki yango, kasi na makoki na Ye ya koyeba makambo liboso, Ayebaki nani akobikisama mpe nani akobikisama te. Bomoni? Wana nde Ye ayebi, ngai nayebi yango te, bino mpe boyebi yango te, boye, tozali kosala mpo na lobiko na biso moko na nsómo mpe kolénga.

¹³³ Sikawa, kasi Nzambe asílá kolengela Liloba na Ye, mpe ezalaka bongo na bileko nyonso. Makoki na Ye ya koyeba makambo liboso esálá ete Atiá na kati na lingomba, mpe na kati na bato, makambo mosusu oyo Asalaki uta ebandeli. Na bongo Nsango-malamu oyo ezali koteyama na eleko *wana* emonisamaka bobele na bato oyo wana, bamosusu bakomona Yango te. Bomoni? “Natondi Yo, Tata, Obombi makambo oyo na miso ya bato ya bwanya mpe ya mayele, mpe Omonisi Yango epai na bana mike oyo balingi koyekola.” Bomoni, yango nde kobongisama liboso. Ezali te ete Asalaki yango, ndenge

bolobaka: “Yo Naponi *yo*, mpe yo Naponi *yo* te.” Na makoki na Ye ya koyeba makambo liboso, Ayebaki eloko nini bokosala.

¹³⁴ Lokola Azangi nsuka . . . Bondimaka ete Azangi nsuka? Soki Azali bongo te, Akoki kozala Nzambe te. Na bongo, bókanisa, lokola Azangi nsuka: Ayebaki nsili nyonso oyo ekozala mokolo moko na mokili, mbala boni nsili yango ekobeta miso, mafuta boni ezali na nsili moko na moko, litíti nyonso oyo yango ekokita likoló na yango; yango nde kozanga nsuka. Kasi biso tozali na nsuka, totatabanaka na molili. Nzambe akokanisaki biso na bampate, mpe tosengeli kozala na Mokambi. Mpe Mokambi yango azali moto te, Mokambi yango ezali Molimo Mosanto, Molimo ya Klisto katikati na biso. “Etikali moke, bamokili bakomona Ngai lisusu te.” Nzoto na Ye ya mosuni emataki na Ngwende ya Nzambe, epai Molimo *ezaláki* kofanda, na Ngwende; sikawa Klisto afandi na Ngwendé yango, Yesu. “Etikali moke, bamokili bakomona Ngai lisusu te, kasi bino bokomona Ngai, mpamba te Nakozala elongo na bino kino na nsuka ya mokili, ata kati na bino.” Ngwende ya Nzambe, ya Klisto, etongami na motema na yo; mpe Afandi na Ngwende ya Nzambe, kasi na Millennium, Akofanda na Ngwende na Ye Moko; oyo, Alápakí ete Akotelemisa Moto oyo, Mwana na Ye, Mwana na Dawidi, mpo Áfanda na Ngwendé na Ye.

¹³⁵ Sikawa, Amonisaka makambo oyo, na makoki na Ye ya koyeba makambo liboso, na baoyo Asilá kobongísa mpo na makambo oyo, soki te, bakomona Yango te. Bazali wana, bazali kotala Yango, kasi bakoki komona Yango te.

¹³⁶ Bato boni basilá komona elilingi oyo ya ngombe na kati ya lisobe, oyo osengeli kotala mpe kotala? Bosilá komona yango? To, bosilá komona liyemi ya Klisto kati na lisobe, to na likoló, to na mapata? Bomoni, moyemi yango abongisaki yango mingi na lolenge ete osengeli kotala yango na lolenge moko boye. Ee, na bongo, ntango omona yango mbala moko, okoki komona eloko mosusu te, bobele yango. Ntango nyonso okotala, yango wana. Bato boni basilá komona bililingi yango? Ee, na ntembe te, bosilá komona yango.

¹³⁷ Ee, ezali bongo ná Klisto Ye moko, Nsango-malamu, mpe Nsango. Nn ntango omoni Nsango ya eleko, okomona eloko mosusu te, bobele Yango. Esili. Biloko mosusu nyonso elímwé, nyonso mosusu ezali bobele likambo ya kotondisa, bomoni, bomoni, na ntango osili komona Nsango!

¹³⁸ Wana ezalaki—ezalaki ntango ya Noa. Ntango Noa ná etóna na ye . . . bomoni ndenge . . . Ntango bamonaki Nsango, eloko mosusu ezalaki na ntina te. Ntango etóna ya Mose bamonaki Yango, likambo mosusu ezalaki na ntina te. Ntango etóna ya Yoane bamonaki Yango, makambo mosusu ezalaki na ntina te. Ntango etóna ya Yesu bamonaki Yango, eloko mosusu ezalaki na ntina te. Ntango etóna ya bantóma bamonaki Yango, eloko

mosusu ezalaki na ntina te. Ntango etónge ya Luther bamonaki Yango, ntango etónge ya Wesley bamonaki Yango, ntango etónge ya ba-Pantekotiste bamonaki Yango, eloko mosusu ezalaki na ntina te, bamilongolaki na makambo nyonso wana. Mpo na nini? Na makoki na Ye ya koyeba makambo liboso, Abongisáká liboso ete makambo yango ésalema.

¹³⁹ Aponaka moto na Ye moko, na makoki na Ye ya koyeba makambo liboso. Ndenge Alobaki awa, na Baloma 8, ete Esau . . . mpo—mpo kopona ya Nzambe ékoka kondimisama. Esau ná Yakobo, bango mibale babótamaki na baboti ya búlee, mapasa, mpo kopona na Ye ékoka kondimisama mpe kozala solo, Alobaki: “Nayini Esau, mpe Nalingi Yakobo,” liboso kútu moko na bango ábotama. Bomoni? Ayebi oyo ezali kati na moto, Ayebaki yango uta ebandeli nini yango ezalaki, na yango Akoki kosala ete makambo nyonso étambola mpenza kokokana na sáa. Biso nyonso tokómaka motema likololikolo mpe motema mokuse; Ye akómaka motema mokuse te. Bango te . . . Bomoni? Nyonso ezali kotambola malamú, kaka ndenge esengeli, likongá ya sáa ezali kobetabeta.

¹⁴⁰ Makambo oyo esengeli kosalema, basi nyonso ná nsuki bakátá, ná mibali oyo balataka ba . . . oyo bazalaka na suki lokola basi na bango. Namonaka bango, mpenza, batiaka ba-bigoudi na nsuki, balíngaka yango awa na liboso. Oyo lipéngwa mpenza! Yango nde mbano ya Edene ya Satana. Bazosala makambo lokola mwasi: mwasi azóluka kokata nsuki na ye lokola mobali na ye; mobali na ye azotika nsuki na ye ékóla lokola mwasi na ye. Mwasi akómi kolata bilamba ya mobali na ye, mpe mobali akómi kolata bilamba ya kati ya mwasi na ye. Bomoni, yango mpenza. Mwasi azali kokóma lokola mobali, mpe mobali azali kokóma lokola mwasi. Bomoni, ezali Edene ya Satana, ekeseni na oyo Nzambe asalaki na ebandeli. Ezali Solo.

¹⁴¹ Soki nabandi yango te, tokokóma na liteya oyo ata moke te. Kasi makambo oyo, ná lolenge mpo na Ye kosala yango, mpe nani akosala yango, wana ezali lolenge oyo Ye Moko aponi, Ye nde aponaka. Nde lolenge oyo Ye alingi yango ésalema.

¹⁴² Ndenge nayokaki Ndeko Pearry Green, mokengeli na biso na Tucson, azalaki koteya na mpokwa mosusu, na ntina na lolenge oyo Nzambe abongisá makambo na ndenge moko boye (Nabosani motó ya liteya na ye.), kasi alobaki: “Lolenge wana nde Nzambe alingaka yango, lolenge wana nde Nzambe asalaka yango.” Ee, ezali solo.

¹⁴³ Sikawa, nani kati na biso akoyebisa Ye ete Azali na libunga? Nani akomeka kotelema liboso na Nzambe, mpo na koloba: “Ozali na libunga, Nkolo, Osengelaki kosala yango ndenge ngai nalingi ete ésalema, ndenge Molakisi *Songolo* alobaki ete esengeli kosalema”? Nani yango azali mpenza na libómá na moto

na ye, mpo na koloba likambo ya ndenge wana? Te, okobima te mpo na na koloba yango polele, kasi okanisaka yango!

¹⁴⁴ Lokola Liteya na ngai na ntina na *Motemeli-na-Klisto*: “Baklisto ya lokuta bakoya.” Sikawa, Alobaki te *ba-Yesu* ya lokuta. Bomoni, moto moko te akotika ete bábenga ye “Yesu,” lokola Nkolo. Kasi *ba-klisto* ya lokuta elingi koloba “bapakolami”.

¹⁴⁵ Oh, bango nyonso bakanisaka ete bazali na epakweli: “Nkembo na Nzambe, akoki kosala *oyo* mpe kosala *oyo wana!*” Kasi pesa ye momekano ya Liloba, okomona nini akobimisa, bomoni, na oyo etali Nsango ya eleko.

¹⁴⁶ Bazalaki na epakweli na ntango ya Yesu, kasi likoló na Ye te.

¹⁴⁷ Bazalaki na epakweli na ntango. . . Ata Datana azalaki na epakweli na ntango ya Mose. Alobaki: “Kokanisa te ete bobele yo moko nde ozali mosantu katikati na biso, Nzambe azali na bango mingi. Tokobanda ebongiseli moko awa, etónge ya bato.”

¹⁴⁸ Nzambe alobaki na Mose: “Kabwáná na ye,” mpe Afungolaki mabelé mpe mabelé emelaki bango. Apésáki Liloba na Ye ya ebandeli na Mose, mosakoli na Ye; Yango nde lolenge bobele moko Ye atikálá kosala yango, mpe nde lolenge bobele moko oyo Ye akotikáláká kosala yango. Abongolaka mwángo na Ye te, bomoni.

¹⁴⁹ Na bongo, mabanzo na biso ezalaka na libunga, mabanzo na Ye ezalaka solo, ntango nyonso. Mpe komeka koyebisa Ye te ete Azali na “libunga”. Ata tokanisi ete moto nani alóngóbani mpenza mpo na mosala, ezali likambo na biso te ya koloba nani nde alongobani mpenza. Sikawa, na esika wana nde bokótaka na ebongiseli.

¹⁵⁰ Ndeko moko elenge oyo atondi na Molimo akei na engumba moko mpe atongi ebongis-. . . atongi e—etónge moko malamau ya bato. Bongo bakokutana na likita, mpe bandeko basantu nyonso bakoyokana, boyebi, mpe bakoloba: “Boyebi nini? Nabanzi elenge *Jones* oyo,” (azali elenge oyo bazali kosepela na ye katikati na bango), “namoni ye nde asengelaki kozala na eyanganelo monene mpe kitoko wana, nabanzi. Bomoni te ete ezali malamau?” Te, oh la la. Mpe abandi. Na nsima, eyanganelo epanzani. Bomoni? Bókabola baoyo! Nzambe nde akabolaka, Ye nde Moto Oyo asalaka yango. Kasi bango nyonso, moko na moko, balingaka kozua elenge *oyo*, kotia ye *awa*, mpe *oyo awa*. Wana ezali makanisi ya bato.

¹⁵¹ Moto azali na mafungóla, kasi na bosolo Nzambe nde asimbaka mafungóla. Bapesaki na bayekoli, na lingomba lisantu, mafungóla; kasi bótala mbala ya liboso oyo basalelaki yango, ntango Yudasí autaki kokweya mpo na mabe na ye. Bayanganaki elongo mpe babwakaki mbese; bazalaki bandeko basantu. Nani akoloba ete bazalaki bandeko basantu te? Nani alobi ete bazalaki basantu te? Kasi babwakaki mbese, mpe ekweaki likoló na Matiasi. Mpe ntango a. . . Asáláká eloko

nini? Eloko moko te. Kasi Polo nde azalaki mophonami! Amen. Wana ezalaki kopona ya Nzambe: elenge Moyuda moko ya zólo egumbámá, motioli, moto ya nkanda-nkanda. Kasi Matiasi te, Molakisi na Bonzambe boyebi, a—azalaki. . . Ezali Polo. Nzambe aponaki Polo; lingomba eponi, eponaki Matiasi. Bomoni? Ozali na ndingisa te ya koloba na Nzambe ete Azali na “libunga.” Ayebi nini kosala, Ayebi nini ezali na kati na moto.

¹⁵² Nani alingaki mpenza. . . Lingomba wana etikálá kopona Polo? Oh, te, ata moke te. Balobaki: “Moto wana nde azali kobwaka biso nyonso na bolóko.”

¹⁵³ Kasi Nzambe alobaki: “Nakolakisa ye makambo oyo ye akonyokwama mpo na Ngai.” Ye ayebi nni.

¹⁵⁴ Malamu, ata biso tokanisi ete moto nani alongobani, Nzambe ayebi moto oyo alongobani mpenza, mpo Ayebi motema ya moto, Ye ayebi.

¹⁵⁵ Kolamuka, to makambo oyo esalemaka te, na ntango oyo biso tokanisaka ete esengelaki kosalema. Tokanisaka: “Ntango yango ekómi sika-sikawa, nkembo na Nzambe!” Namonaka na milulu na biso mpe nyonso wana, ya Bato na Mombongo: “Kolamuka monene ezali koya sikawa, aleluya!”

¹⁵⁶ Bópéngwisama te: “Asílá koya, mpe basalaki ye na motindo oyo ekomamaki.” Bomoni? Kasi bakanisaka ete kolamuka moko ezali. Ezali nde kosalema? Te! Esili, ekufi, esili. Iyo. Bótala, oyo ezali ntango ya kosukola mínda, ya kobima mpe kokota. “Baoyo batalelaka Nkolo bakoza makasi ya sika.”

¹⁵⁷ Bótala awa, na esika touti kotánga, bótala Dawidi, mokonzi ya Yisalele, ye moto azuaki emoniseli ya kozongisa sandúku ya Nzambe na esika na ye; mpo, na mikolo ya Saulo, batikálá kotuna toli na yango te, mpamba te Saulo asíláká kozonga nsima. Boye, batikálá lisusu kotuna toli na sandúku te, kondimana, na mikolo ya Saulo, mpo asíláká kozonga nsima mpe kotangwa mosika na Nzambe. Boye Dawidi, noki-noki, ná mpéméla. . . Sikawa bótala oyo malamau, okoki mpenza kokosama na litáangi yango, soki ososoli yango malamau te. Mpe namoni ete ntango ezali koya, oyo tosendeli kokóma mibali mpenza, na esika ya kozala ba-bebé. Iyo. Tosengeli kolia bilei ya makasi, na esika ya komela miliki.

¹⁵⁸ Bótala Dawidi, mokonzi ya Yisraele, mokonzi autaki kopakolama mokonzi sika; to koponama mokonzi, Saulo. . . Samwele apakolaki ye, na mokano na Nzambe; mpe azalaki mpenza mokonzi oyo Nzambe aponaki, ntembe moko te na likambo yango. Mpe tala ye oyo, mpe mpéméla ekiteli ye. Emonisamelaki Dawidi. Ye nde azuaki emoniseli, moto mosusu te alobeláká likambo yango. “Tókende kozua sandúku, mpo ezali mokano na Nzambe ete tózala na sandúku awa elongo ná biso, mpo tótunaka toli na Nzambe na nzela na sandúku yango.”

Ezalaki mpenza, mpenza likambo moko ya malamamu. Bokanisi bongo te? Malamamu.

¹⁵⁹ Bómikanisela, kasi, lokola ye azalaki mokonzi, mpe azuaki emoniseli, alongwaki na esika na ye. Mosakoli moko azalaki na mboka, na nkombo Natana, ye moto abongisamaki mpo na kozua emoniseli yango. Soki likambo ya koloba ezali, Alobaki: “Nkolo asalaka likambo moko te, soki Amonisi yango liboso te, na baombo na Ye basakoli.” Kasi, bomoni, Dawidi, lokola azalaki mokonzi, ná epakweli likolo na ye. . . . Sikawa, wana ezali Likomi? Ná epakweli likolo na ye, mpe azuaki emoniseli ya solo; kasi ezalaki libunga: Mpamba te Natana nde azalaki mosakoli ya eleko wana; kasi emoniseli yango etikálá koya te epai na Natana; mpe ntango emoniseli eyaki epai na Dawidi, atikálá kotuna toli te epai na Natana na ntina na yango. Akei bobele liboso mpe asali ndenge alingaki kosala. Ah-ah.

¹⁶⁰ Kasi bótala banani Dawidi atunaki toli, awa, na mokapo ya 13: “Kasi atunaki toli na mikóló na nkóto mpe na mokámá,” na eyanganelo na ye. Bomoni? “Sikawa, bomoni te ete tosengeli kosala. . . .?” Ezali bongo te. Sikawa, azalaki komeka kosalela Nzambe mosala, kasi abongisamáki te mpo na kosala yango; bomoni, mpo Nzambe azalaki na lolenge moko ya kosala.

¹⁶¹ Kaka ndenge moko mpe Nzambe akokaki kosolola na—na mokonzi na ntina na bokono na ye mpe kobikisa yango, kasi Asalaki yango te, Azalaki na nzela oyo ebongisámá mpo na kosala yango, ezalaki mosakoli na Ye. Boye Asololaki na mosakoli, Yisaya, Ayebisaki ye ete ázonga mpo áyebisa Hizikiya likambo oyo elingaki kosalema.

¹⁶² Sikawa, Hizikiya azalaki kosolola na Nzambe miso na miso, mpe—mpe Nzambe akokaki kosolola na Hizikiya, na ntembe te, kasi Abongisáká banzela mosusu! Bososoli yango? Nzambe asalaka na lolenge na Ye Moko ya kosala makambo: ya kotinda kolamuka, ya kosolola, ya koloba, to likambo nini. Azalaka na lolenge na Ye ya kosala yango, mpe tozali banani mpo tóyebisa Ye ndenge ya kosala yango. Asalaka yango na ndenge esepelaka Ye kosala yango.

¹⁶³ Boye bomoni, Dawidi, lokola azalaki na mpémélá. . . . Sikawa, boyebi lisusu nalobelaki epakweli, epakweli ya lokuta? Bomikanisela, Molimo Mosanta akoki koya kopakola moto, mpe ata bongo, ezali libanda ya mokano na Nzambe. Awa, Etalisi yango polele awa. Bomoni? Tosengeli kolanda lolenge oyo Nzambe asalaka yango, lolenge na biso te, lolenge ya Nzambe ya kosala yango. Mpamba te, Dawidi, lokola azalaki mokonzi, apakolamaki, apakolamaki na Molimo na Nzambe likolo na ye (elilingi ya Yesu Klisto), kasi wana ezalaki nzela ya Nzambe te.

¹⁶⁴ Mpe eyanganelo mobimba, “esepelisaki bango,” ndenge Biblia elobi. Bótala malamamu, mikóló na nkóto mpe na mokama, lisusu banganganzambe ná ba-theologien bamonaki yango

“kitoko mingi”. Tala biteyelo ya Biblia na bino ná nyonso mosusu, bamonaki ete ezalaki “kitoko mingi”. Kutu bato nyonso bandimaki, ná banganganzambe, ná—ná bango nyonso bandimaki ete epakweli ya mokonzi ezalaki ya solo. Bótala! Kasi Nzambe alakáká te ete Akomonisa Liloba na Ye, na eleko na Yango, epai na *bango*. Nzambe azalaki na lolenge na Ye ya komonisa Liloba na Ye, kasi epai na *bango* te. Bómikanisela, ekesanaki na Nzambe.

¹⁶⁵ Ekokani mwa moke na mikolo ya Mika, mwana ya Yimila. Bozali koyeba lisusu lisolo yango? Yuda ná Yisraele ekabwanaki, mpe bakómaki na bokonzi mibale oyo ekeseni, mpe Akaba azalaki mokonzi likoló na bokonzi moko. Mpe Yosafata azalaki mokonzi likoló na mokonzi—bokonzi ya Yuda, nabanzi bongo; mpe Akaba azalaki mokonzi likoló na Yisraele, na Yelusaleme.

¹⁶⁶ Bótala, na bongo etónza ya bapaya eyaki kobotola eteni ya mboka oyo Nzambe apesáká bango, oyo Nzambe apesáká na Yisraele, mpe Bafilistia wana, kuna, to Basulia, bakangaki mabelé yango mpe bazalaki koleisa bana na bango uta na mabelé oyo ezalaki ya Yisraele. Boye bango bazalaki na mposa ya mabelé yango mpo na koleisa bana na bango moko ná mabota na bango moko. Nzambe apesáki bango . . . wana ezalaki makoki Nzambe apesáká bango.

¹⁶⁷ Na bongo Akaba abengisaki Yosafata, mpe alobaki: “Yaka awa.” Alobaki: “Tala kuna eloko oyo monguna na biso azali kosala. Ezali malamumu ete biso, libota na Nzambe, ná makoki oyo Nzambe apesá biso, ete tosengeli kozua mboka oyo, ezali ya biso, Nzambe, na nzela na mosakoli na Ye, Yosua, nde akabolaki mboka yango, esengeli kozala ya biso, ezali ya biso, ya bana na biso, mpe sikawa ba-communiste babotoli yango? Mpe tozali na . . . Tokómi kokufa nzala, mpe bango bazui makoki oyo Nzambe apesaki biso. Omoni te ete tosengeli kokende kuna mpo na kozongisa mabele na biso? Soki bosangisi mampinga na bino: soki bino ba-Methodiste, ba-Presbiterien, bino nyonso, ba-Presbiterien, ba-Lutherien, mpe bongo na bongo, soki bino nyonso bokóti na likita ya mangomba oyo, biso nyonso tokosangana, tokozua eloko yango.” (Nazali kotalisa mpe koloba yango lokola lisese sikawa.) “Tokokende kobotola yango.”

¹⁶⁸ “Ee,” alobaki, “ya solo, biso nyonso tozali moto moko.” Hum.

¹⁶⁹ Sikawa, Biblia elobi: “Ndenge nini bato mibale bakoki kotambola elongo soki bayokani te?” Bomoni?

¹⁷⁰ Wana nde epai oyo moto monene wana, Pantekotiste monene wana, Yosafata, asanganaki ná etónza ya mabe. Mpe yango nde esili kokómela ba-Pantekotiste na biso lelo. Bato ya solosolo bazali kuna, kasi bamisangisi na etónza ya denomination wana. Bóbima na likambo yango! Elakelami mabe na Nkolo!

171 Bótala sikawa! Azalaki wana, mpe alobaki: “Iyo, eyokani malamumu.” Alobaki: “Makálo na biso ezali ya bino; ná bato na biso. Nsima na nyonso, biso nyonso tozali Bayuda. Na ntembe te, tokokende elongo ná bino.” Kasi Yosafata azalaki naino na mwa religion oyo ekoki mpo na koloba: “Omoni te ete to—tosengeli liboso kotuna toli epai na Nkolo?” Bomoni? “Nakanisi ekozala likanisi moko malamumu.”

172 Ee, Akaba: “Na ntembe te.” Alobaki: “Ee, oh, na ntembe te, nasengelaki kokanisa yango.”

173 “Ee, moto na Nzambe moko azali na esika moko boye? Bozali na mosakoli?”

174 “Ah, nazali na bango nkama minei. Nazali na likita mobimba awa, denomination mobimba. Bazali basakoli ya Baebele.”

175 Sikawa bóbosana te, Biblia elobi ete bazalaki “*basakoli*, basakoli ya Baebele,” basakoli ya bapakano te, kasi basakoli ya Baebele; eteyelo mobimba, líkindo ya théologie.

176 “Ee, memá bango awa!”

177 Mpe bakonzi balataki mpe bafandaki liboso na ye mpo na kobetisa motema ya mosakoli. Mpe tala ayaki, nabanzi ezalaki Sedekiya moto ayaki, mokonzi monene na bakonzi ya mangomba ya likita ya district, to soko nani oyo ye azalaki, ayaki wana katikati na bango. Amisalelaki maseke mibale ya minene, alobaki: “Nzambe asololaki na ngai. YANGO ELOBI NKOLO: ‘Ná maseke oyo bokobengana Basulia libanda na mboka yango.’”

178 “Oh, nkembo!” Bato nyonso bamonaki ete ezalaki malamumu mingi, kitoko.

179 Bótala malamumu sikawa, ndenge ezali kokoma pembeni na míno ya gilette, kati na solo ná lokuta. Mpe bóbosana te ete ekokweya na ngámbo moko to mosusu, sukasuka, bokeseni kati na solo ná lokuta, ekokóma moko lokola gilette epelísami. Esengeli kozala Liloba moko na moko ya Nzambe; ezali te likambo ya penepene na Liloba moko na moko, kasi Liloba moko na moko mpenza! Mpe lelo, ekómi na ba-Lutherien te, na ba-Metodiste te, na ba-Pantekotiste te, kasi na eleko oyo epelísami, na eleko oyo epai wapi epakweli ya motemeli na Klisto ezali ya kobonga be mpenza, ekoki kopéngwisa ata Baponami mpenza, bakoki kokweya na ngámbo ya mabe, soki bakebi te, lokola mwa mpáta. Bótala malamumu! Bósala keba! Tozali kobika na eleko ya ba-Pantekotiste te, sikawa. Tosili koleka eleko yango, kaka ndenge tolekaki ba-Lutherien, mpe tolekaki . . . Bomoni?

180 Bótala. Sikawa, basakoli yango nyonso basakolaki, nkama minei mobimba, bazalaki koleisa bango malamumu, kolengela bango malamumu, basakoli ya Baebele nde bapesaki bango litatoli, na boyokani moko: “YANGO ELOBI NKOLO: ‘Bókende, Nkolo azali na bino.’”

181 Yosafata alobaki: “Ee, e—eyokani malamu. Kasi,” alobaki, “ozali na mosusu?”

182 “Mosusu moko? Tozali na denomination mobimba awa, tozali na likita mobimba esangani awa. Mpo na nini tósengeli na mosusu?”

183 Alobaki: “Ah, kasi nakanisaki ntango mosusu, akokaki kozala na mosusu moko.”

184 Alobaki: “Oh, iyo, mosusu azali, kasi azali kutu moto ya likita oyo te.” Ah-ha. “Azali mobengani. Ezali Mika, mwana na Yimila, mpe nayinaka ye.” Bomoni? Alobaki: “Bakolinga koyamba ye te kati na boyokani na bandeko, mpe azali na ye mobengani moko boye mpo na kobanda. Mpe azalaka ntango nyonso, makambo nyonso asakolaka, alingaka koléndisa líkindo na ngai ata moke te.” Ah-ha. “Mpe asalaka makambo ya mabe nyonso oyo, asakolaka ntango nyonso mabe mpo na ngai, kaka mpo na kozala na bokeseni.”

185 “Oh,” Yosafata alobaki, “mokonzi áloba bongo te. Kasi ngai nakolinga koyoka likambo nini moto oyo asengeli koloba.”

186 Alobaki: “Ee, tokoluka ye.” Boye bakendeki koluka ye na esika moko boye, na esobe, batindaki moto moko.

187 Alobaki, ayebisaki ye, alobaki: “Sikawa, wana ozali kozonga sikawa, nalingi koyebisa yo likambo moko. Olingi kozonga na denomination lisusu?” Bomoni? “Olingi kozonga na boyokani ná bango nyonso lisusu? Soki olingi, loba bobele ndenge mokonzi ya etuka alobi, loba bobele likambo moko ndenge eveke alobi, mpe bakozongisa yo mbala moko. Oyo nde ntango ya kosala yango.”

188 Kasi bokoki kobanza mosakoli ya solo ya Nzambe, oyo apakólámá, ákakola Liloba moko ya Nzambe? Ata moke te!

189 Alobaki: “Lokola Nkolo azali na bomoi, nakoloba bobele oyo Nzambe akoloba!” Tosengeli na mwana ya Yimila. “Lokola Nkolo azali na bomoi, nakoloba bobele oyo Ye akoloba.” Ezali ya solo: “Oyo Ye akoloba.”

190 Na bongo, ntango bakómaki wana, liboso na bato, basakoli nyonso balobaki: “Sikawa, loba oyo bango. . .”

191 Alobaki: “Bózela, bópezesa ngai butu ya lelo, bótika nájala oyo Nkolo akoloba.” Boye, na butu wana, Nkolo akutanaki na ye na emononeli, mpe ayebisaki ye eloko nini asengelaki koloba.

192 Na ntongo elandaki alobaki: “Olobi nini, Yimila?” wana bango nyonso bazalaki wana. . .kutu nde “Mika, mwana na Yimila,” alobaki, “olobi nini sikawa? Bisu nyonso tosangani awa, banganganzambe nyonso, basakoli nyonso, bakonzi nyonso, mpe bato nyonso bafandi awa elongo. Yo olobi nini sikawa, na likita monene oyo?”

193 Alobaki: “Kende,” alobaki, “kasi namoni Yisraele kopalangana lokola bampate oyo bazangi mobateli.”

194 Mpe Akaba alobaki: “Nayebisaki yo nini! Motomboki wana akokaka bobele kosakola mabe mpo na ngai!”

195 Ndenge nini akokaki koloba eloko mosusu, na ntango oyo, Nzambe azalaki koloba likambo yango moko? Mosakoli asengeli kozala monoko na Nzambe oyo ezali koloba, makanisi na ye moko te. Ya ye... Bomoni, azali mobimb-... amipésá mpenza mobimba na Nzambe na lolenge ete alingaka koyokisa mpasi te, kasi asengeli koloba oyo Nzambe alobi, mpamaba te ye moko akoki kopekisa Yango te. Bomoni?

196 Alobaki: “Sikawa, nayebisaki yo te?”

197 Na bongo mo—moto monene yango apusanaki, ná liséké, mpe abetaki ye na monoko, alobaki: “Molimo na Nzambe elekelaki wapi, ntango Ebimaki kati na ngai?” Na elobeli mosusu, nakomeka koloba yango polele: “Yoka ngai malamumu... Yoka malamumu, nalingi koyebisa yo likambo moko, Mika. Ozali koyeba ete ngai nazali molakisi na Makomi? Ozali koyeba ete nazali na epakweli?” To, “Libatisi,” ndenge tokoki koloba yango lelo. “Ozali koyeba ete nazali na yango?”

198 Yimila alobaki: “Natii ntembe na yango te.”

199 Alobaki: “Kasi yoka! Molimo na Nzambe eyebisi ngai, mpe etatoli yango ná basakoli na ngai nkama minei oyo, ete biso ‘tokobengana Basulia libanda na mboka.’ Bongo yo ozali nani mpo óyá koloba ete bakoboma mokonzi monene na biso?” Alobaki: “Molimo na Nzambe nde eyebisaki ngai yango.”

200 Tika naloba yango polele mpo bósosola yango. Mpe ntango mosusu, tomoni Mika koloba: “Lobi na butu, na emononeli, misie, namonaki Nzambe afandi na Ngwende. Mpe namonaki mampinga mobimba ya Likoló eyangani zinga-zinga na Ye, ah-ah, mpe bazalaki kosala likita na Likoló. Balobaki: ‘Nani yango tokoki kotinda na nse mpo ákende kopéngwisa Akaba? Mpamba te, awa na nse na Ngwende, mosakoli moko azali wana, mosakoli ya solo, nkombo na ye Eliya. Mpe asilaki kosakola na nzela na Liloba na Ngai mpe alobaki ete “Akaba, moto na nkanza wana, lokola abomaki Naboti, ba-mbwá bakoleta makila ya moto na nkanza wana,” mpe tosengeli kokokisa Yango, mpo Esilaki kolobama, Ezali YANGO ELOBI NKOLO! Esengeli kokokisama, esengeli kosalema kuna. Kasi tokosala yango ndenge nini?”

201 “Na bongo, uta na misanda ya nsómo ya babúngi, na nse kuna, molimo moko emataki, alobaki: ‘Ngai nazali mopéngwisi. Soki nakoki kosungá Yo, nakokita kuna mpe nakokota kati na mosakoli na ye.’” Mpamba te, bakómákí mpenza ebongiseli, na lolenge ete bakosósola bobele eloko moko, mpe yango ezali mwa kotúntuka. “Mpe nakosala ete básakola lokuta. Mpe nakosala ete Akaba áyokela bato minene wana na esika ya koyokela mosakoli na Yo ya solo; mpo ete, ye akotala-tala malamumu nyonso oyo akoloba na Liloba na Yo, akotala-tala malamumu mamóno na ye na nzela na Liloba, akotala-tala malamumu nyonso oyo

akosala na nzela na Liloba, mpe soki elongobani na Liloba te, akoyoka yango te. Kasi soki e . . . Nakoki kopéngwisa bamosusu wana, mpe nako . . . bango . . . Akaba atiaka motema mingi na lisanga monene wana, mpo na kobatelama na bango, na bongo bakotambola elongo mpe bakosangana. Mpe nakosala ete Akaba áyókela bango mpe ákende kuna. Tokosala yango bongo nde.”

202 “Nzambe alobaki: ‘Okoki kosala yango, ozali mpenza mopéngwisi; kende kuna.’”

203 Na bongo Sedekiya abetaki ye mbata na monoko, alobaki: “Ozalaki wapi . . . ?”

204 Alobaki: “Okoyeba yango ntango okozala ofandi na kati ya boloko.” Ah-ha.

205 Alobaki: “Kende!” Sedekiya alobaki epai na mokonzi. Alobaki: “Kende mpe zonga na kimia!”

206 Akaba alobaki: “Bózua moto yango mpe bóbwaka ye na bolóko. Bókanga ye minyolólo, bóleisa ye lípa ya bolozí ná mai ya bolozí. Mpe ntango nakozonga awa, nsima na elóngá na ngai, oyo basakoli na ngai bayebisi ngai, ete ‘na ntembe te, kolamuka oyo na ntembe te ekosalema,’” alobaki, “nakotala likambo ya moto wana!”

207 Bóyóka maloba ya nsuka ya Mika epai na moto yango: “Soki esalemi ete ozóngi, boye, Nzambe atikálá kosolola na ngai te.” Amen.

208 Bomoni, Nzambe azali na lolenge na Ye ya kosala makambo. Bato oyo bakanisaki ete bazalaki kosalela Nzambe mosala. Bósala keba! Ezali kotúntuka te, komemama te, mabanzo te, kasi esengeli kozala “YANGO ELOBI NKOLO,” esengeli kozala ya solo. Malamu, ata soki . . . Tomoni ete makambo oyo ezali bongo.

209 Bótala, sikawa, ntango Dawidi apesaki esákólá ya motuya oyo, mpe emonanaki lokola ezalaki malamumu, likambo moko ya malamumu ya kosala. Na nsima, tomoni ete (Nazali kolembisa bino? Ntango eleki mpo na koloba likambo mosusu?) basakolaki maloba ya motuya oyo, atunaki toli na mosakoli te.

210 Sikawa, moto nyonso ayebi ete Aмосa 3:7 elobaki ete Nzambe alakaki ete Akotikálá kosala eloko moko te soki naino Amonisi yango te epai na mosakoli na Ye. Na bileko ya lingomba tozalaki na ba-reformateur; kasi elakami na Malaki 4 ete mosakoli moko akoya na mboka, na mikolo ya nsuka (mpo esengeli kolóngobana na ndakisa yango, bomoni) liboso ntango ya nsuka éyá.

211 Liboso Yesu áyá mbala ya liboso, Eliya ayaki, Eliya ya Malaki 3. Matai 11 elobi yango: “Soki bokoki kosósola yango, ye azali oyo elobamaki na ntina na ye: ‘Tála Nakotinda motindami na Ngai—na Ngai liboso na Ngai.’” Sikawa, Asakolaki, ba-theologien nyonso bandimaka yango: ete na ntango ya nsuka mpe, Molimo ya Eliya esengeli koya. Esengeli koya mbala

mitano, nde Nzambe azali kosalela Molimo yango: Elisa, Eliya, Yoane Mobatisi, mpe mpo na lingomba ya Mabota, mpe na nsima, mpo na Bayuda na Emoniseli mokapo ya 11. Ezali n-g-o-l-u na Nzambe, k-o-n-d-i-m-a [na Anglais: f-a-i-t-h—Mok.], Y-e-s-u [na Anglais: J-e-s-u-s], Yesu, nko—nkomá mitano. Ekoki kosuka na minei te, esengeli kokende kino na mitano. Bomoni? Bótala!

²¹² Sikawa, Alakaki yango, boye wana elongobani na Biblia, kaka mpenza na mokolo oyo, Sodoma ná Gomora. Mpe Eliya azalaki te. . . Wana ezalaki Eliya te; Wana ezalaki Molimo na Nzambe likoló na Eliya; Eliya azalaki bobele moto. Sikawa, tosilá kozala na ba-Eliya, minkóto ya Eliya, ba-kazáka ya Eliya, mpe nyonso ya Eliya. Kasi Eliya ya lelo oyo ezali Nkolo Yesu Klisto. Ye asengeli koya, kokokana na Matai, zomi na nsamb- . . . ezali Luka 17:30, Mwana na moto asengeli komimonisa Ye moko katikati na libota na Ye. Moto te, Nzambe! Kasi ekoya na nzela na mosakoli. Sikawa, atikálá kozala na basakoli minene mibale na ntango moko te, na mokili, ata moke te. Bomoni? Etali te ndenge nini. . . mitó mibale—mibale ekoki te. . . Esengeli kozala bobele motó moko. Nzambe asengeli kozua bobele moto moko na nsé ya bokonzi na Ye. Bomoni? Nzambe azali bobele moko; ezalaki na Tata, Mwana mpe Molimo Mosantu, kasi Nzambe moko likoló na nyonso wana, bótala, Asalelaki bobele misala wana. Ezali mpe bongo ná Eliya, Molimo ya Eliya; Asalelaki Molimo yango, kasi bobele Nzambe yango moko nde azalaki kokonza Yango ntango nyonso, mpo na kokokisa Liloba na Ye.

²¹³ Sikawa, bótala likambo oyo sikawa, Dawidi akanisaki ete atiaki makambo nyonso na molongo. Mpe azuaki mpémélá. Bomoni ndenge Molimo Mosantu ekoki kopakola moto? Kasi esengeli kozala na molongo ya epakweli. Molimo na libanda ekoki kopakolama na Molimo Mosantu, kasi elimo kozala moíndo lokola goudró. Nzúbe ekólaka bobele na mai moko oyo ekólisaka. . . oyo epesaka bomoi na blé, epesaka mpe bomoi na nzúbe; kasi na kati ya nzúbe, bomoi ya nzúbe nde ezali kuna. Ezali kosepela, kobimisa feléle, ezali na bomoi, mpe ezali kosala nyonso oyo blé esalaka, kasi *elimo* na yango ezali *nzúbe*. Bomoni? Balakisi ya lokuta bakoki kotelema, kolakisa malakisi ndenge na ndenge ya bosato mpe nyonso wana, mpe kopakolama na Molimo Mosantu mpe kosala bikamwa ebele mpenza, lokola oyo Nsango-malamu ya solo ekoki kosala. Kasi na nzela na Liloba, awa, nde likambo oyo esalaka. Bomoni oyo nalingi koloba? Sikawa, ezali mabe te koteya liteya oyo, nabanzi, nazali—nazali na kati ya tabernacle interdenominationel, na ntongo oyo, awa na—na hôtel oyo.

²¹⁴ Bótala, bólandela mpenza likambo oyo tozoloba. Sikawa, ee, bóyoka. Dawidi azalaki na kotúntuka nyonso oyo kolamuka ya solo ezalaki na yango. Bótala malamumu! Babelékaki, bagángaki, babinaki, bazalaki mpenza kozua litómba moko uta na epakweli yango. Na ntembe te! Nyonso ezalaki lokola kolamuka ya solo,

kasi, bomoni, Nzambe azalaki kati na yango te. Nzambe azalaki kati na yango te. Azalaki na mosakoli moko kuna, na mboka. Basengelaki koyeba yango. Bomoni? Dawidi asengelaki koyeba yango.

²¹⁵ Eloko moko lelo, tozali na mecanique nyonso, ndakisa, ba-denomination minene, ba-campagne ya ntango na biso, kasi mbano na yango ekokani mpenza na oyo ya eleko wana; mbano na biso, ya ba-campagne na biso ya minene, mabanzo na biso ya malamumu mpe ya minene, bandáko na biso ya minene, mpe bandako na biso. . . nkóto na nkóto ya minene, kobakisa bandimi mpe nyonso wana, ezali kosuka bebele ndenge moko, mobulungano ya somo. Nazoloba yango te mpo na kozala ndenge mosusu, nazoloba yango mpo na kozala sembo liboso na Nzambe, Oyo na Buku na Ye nde natelemi na ntongo oyo. Bomoni? Nyonso wana esuki na mobulu, bebele na mbano yango moko.

²¹⁶ Sikawa tótala nini esalemaki ntango Nzambe (na ntango mpe na eleko na Ye) mpe basakoli na Ye batiolakama, mpo na kotalela líkindo, banganzambe, ki bo-denomination ndenge tozali kosala lelo. Sikawa, bóyoka na bokebi nyonso. Nyonso esukaka na kobeba. Soki Molimo ya solo ya Nzambe nde ezali kuna, Ekokamba yango kino na kati ya Liloba; kaka na esika moko te kati na Liloba, Liloba mobimba mpo na eleko mobimba. Bomoni?

²¹⁷ Na Mokolo ya Pantekote, Molimo ekambaki yango mbala moko na Yango, na Yoele 2:38. Bomoni? Na mokolo ya Luther, Ekambaki yango mbala moko na Yango; na Wesley; na mouvement ya nsuka, oyo ya Pantekote; kasi oyo ekómi eleko mosusu, oyo ezali kobengama ya Mwasi na libala mpo na kobima. Ezali te oyo esalemaki na Pantekote, eleki mibu nkóto mibale, to kozongela, to kozonga. Pantekote. . .

²¹⁸ Molimo Mosanto ezalaki kati na Luther, Molimo Mosanto ezalaki kati na Wesley; Liloba na Nzambe nde ezalaki kopakolama. Mpe Molimo Mosanto ezongaki epai na bato ya eleko yango, mpe babandaki kozua kozóngisama ya makabo. Bamonaki, na komitikáká na maboko na Nzambe, ete Molimo Mosanto akómaki koloba minoko na sika na nzela na bango. Batielaki babeli maboko, mpe bazalaki kobika. Bazalaki kobina na Molimo. Bomoni? Wana ezalaki eleko ya Reforme kozongisáká lingomba na molongo. Mpe molongo ya nsuka na lingomba ezalaki kotia makabo na kati ya lingomba; lokola Luther atiaki kolongisama, Wesley atiaki kobulisama, Pantekote etiaki makabo. Kasi basalaki nini? Libunga yango moko, ndenge ezalisami etalisaka yango na mobímbe ya blé, bango bakómaki denomination, yango ezali kotelemela Nzambe, kokesana na Nzambe.

²¹⁹ Sikawa, tomoni ete ntango. . . Bongo ntango basangisi mibímbe oyo basangani elongo, basali makanisi na bango moko.

Mpe etali te... Ntango “likambo ya sika”, ndenge babengaka yango, ebandaki epai na ba-Assemblée de Dieu, basalaki nini? Bakokaki koyamba Yango te. Ata libatisi na Nkombo na Yesu Klisto ezalaki Solo ndenge nini, bango basilaki kokóma Conseil General. Moto asilaki kozua bokonzi, Molimo asilaki kotika bango. Ya solo! Na bongo, likambo yango ebandaki... Nasolólá na mwa bakambi na bino ya malamú koleka; bango balobaka: “Ee, sikawa tokosala nini?” Bakoyoka nsóni. Nzokande, bayebi ete ezali Solo; soki te, bazali bakúfi miso mpe baínga, na molimo, na oyo etali Biblia. Nazali koloba yango na nkanza te, sikawa, nazali koloba yango na limemíá nyonso. Mpamba te, ata esika moko te na Biblia elobi ete moto moko asílá kozua libatisi na bibiangelo wana, “Tata, Mwana mpe Molimo Mosanto.” Mpe etikálá kosalelama te kino nsima ya likita ya mangomba, na lingomba Katoliko ya Roma. Katekísimo na bango moko etatoli likambo yango moko. Ezali eyámbweli ya Katoliko! Ezali mateyo ya Biblia te, kasi eyámbweli ya Katoliko. Mpe bino ba-Metodiste, bomemi bakatekísimo na bino, mpe nyonso wana, kaka ndenge bango bazaláká na yango, bobimaki na yango malembe-malembe. Kasi sikawa, ntango bokómaki ba-Pantekotiste, bopalánganisaki mwa biyámbweli oyo, oyo bozalaki naino kokangama na yango.

²²⁰ Kasi sikawa ezali kobengama ya Mwasi na libala, sikawa ezali ntango Bilembo Nsambo efungwami, sikawa ezali ntango oyo makambo nyonso oyo ba-reformateur batikaki, esengeli kofungwama; mpe bobele Malaki 4 nde akoki kosala yango, mpamba te, esengeli na emoniseli kouta semba na Nzambe kino na moto moko mpo na kosala yango. Ya solo! Ekoki koya na lisanga moko te, etikálá kosalema te. Moto moko! Yango nde Nzambe alakaki, na elílingí ya boyei mpo na Mwasi na Ye ya libala: Eliezere. Bomoni?

²²¹ Bótala, na ntango yango banganzambe, batei mpe bongo na bongo, bazali kozua mpémélá na bango moko, mpe bazali mpenza kopakolama. Dawidi apakolamaki. Biblia elobi bongo. Kasi, bomoni, alekaki na liziba oyo esengelaki te, alandaki nzela oyo esengelaki te. Atalisaki epakweli na ye na ngámbo oyo ya malamú te, epai na bato mpe na oyo bazalaki kokanisa, na bakonzi-mapinga, ná oyo bazalaki kokanisa, na esika ya kotalisa yango na nzela ya búlee ya Nzambe mpo na koyeba oyo YANGO ELOBI NKOLO ezalaki, “Oyo nde ntango mpo na yango? Oyo nde eleko mpo na yango? Oyo nde mokano na Nzambe?”

²²² Na bongo, soki azali mosakoli na Nzambe ya solo, akokende naino liboso na Nzambe, akoloba: “Tata, ezali nini?” ndenge Natana asalaki, na nsima, epai na Dawidi.

Dawidi alobaki: “Ezali malamú mpo na ngai kofanda na ndako ya sédre, mpe sandúku ya Nzambe na ngai efandi kuna, na nse na bahéma?”

223 Bótala Natanaele, alobaki: “Dawidi, sala nyonso oyo ezali na motema na yo, mpo Nzambe azali na yo. Ozali mbeki oyo epakolami na Nzambe.”

224 Kasi lokola ye azalaki mosakoli, mpe asalaki libunga, Nzambe asengeli na mosakoli na Ye. Na butu wana, Ye amonanaki na ye, alobaki: “Kende koyebisa mosali na Ngai Dawidi ete Nasepeli na mpiko na ye, Nalingi ye mpo na yango, mpo azali moto oyo abongi na motema na Ngai Moko, mpe Nayebi ete ntango ekoki mpo sandúku na Ngai ékóma bongo, étíama na nsé na eloko moko, kasi Ngai. . . Ezali na eleko yango te mpo na yango kosalema. Nakotika mwana na ye ásala yango, kasi Nakotika te ete ye asala yango.”

225 Na bongo Natana ayaki na “YANGO ELOBI NKOLO, Dawidi, emoniseli monene oyo ozuaki ezali mpenza na libunga, lokola oyo ozuaki ntango oyaki na sandúku awa.” (Ah-ha! Ah-ha! Bomoni?) “Komeka kosala yango te. Komeka te! Kasi Nzambe alobi Akotika ete ‘mwana na yo ásala yango.’” Yango wana! Bomoni? Yango mpenza!

226 Dawidi apakolamaki mpo áloba bongo, mpamba te asíláká komona yango liboso, kaka ndenge Abraham azaláká koluka Engumba moko na mokili oyo. Boyebi, azaláki koluka yango, mpamba te mokolo moko, akofanda awa, ye Abraham, na Engumba yango. Mpe azalaki kotambolatambola mpo na koluka yango. Mpe kaka na mabelé yango, epai azalaki koluka, ezalaki naino likolo na ye, na ntango wana, mpe akozonga na Millennium mpe akofanda na Engumba yango. Kasi lokola mosakoli, asíláká kobongisama mpe kozua mpémélá, ayebáki ete Engumba moko ezalaki esika moko boye, mpe azalaki koluka yango. Kasi, bomoni, emoniseli na yango mobimba ebombamelaki ye. Ezalaki mpo na eleko na ye te. [Maloba mazangi na bande—Mok.] . . . kino na Yoane, esika oyo ye amonaki yango kokita uta na Likoló, longwa na Nzambe. Yango nde ezalaki Engumba yango.

227 Bomoni, nyonso esengeli kozala kati na eleko na yango. Okolóna blé na yo na printemps, mpe. . . to na automne, mpe obuki yango na eté oyo elandi. Bomoni? Esengeli komata na nzela na mobímbi, na nsima, koleka na feléle, na mposo, mpe bongo na bongo kino na . . . Esengeli kozala na eleko na yango. Lizalisami nyonso etambolaka na bokóbi. Molimo ya Nzambe nde esáláki lizalisami, mpe Nzambe, ná lizalisami, nyonso ezalaka kati na bokóbi. Biloko nyonso oyo etiamaki na tempelo ezalaki elílingí ya oyo amónáki na Likolo.

228 Soki omoni nzete ezali kobunda mpo na kotíkala na bomoi, elingi koloba ete nzete moko ezali, oyo ekufaka te. Soki omoni moto azali kobunda mpo na bomoi, elakisi ete mongombo moko ezali kozela esika moko boye, oyo ekufaka te. “Soki mongombo oyo ya mokili ebebi, tozali na mosusu oyo ezali kozela.” Tata

malamu na Likoló apesaki ngai nzela ya koleka na ngámbo mosusu ya ridó wana, mokolo moko, mpe komona yango. Bato boni bayóká li...?... Bomoni? Kotala na ngámbo mosusu ya ridó ya ntango. Kuna, ezalaki kaka ndenge nazali koteya bino nyonso, bazalaki wana. Milimo na nsé na etumbelo, bazalaki kogánga: “Ntango boni?” Ezali lisapo mpamba te, kasi moto oyo azalaki na mayele: “Kino ntango nini, Nkolo?” Bomoni? Ntango tokómi komiyoka bongo sikawa, wana mibu na biso ezali kopusana, lokola Ndeko Bill Dauch afandi wana, na mibu ntuku libwa na misato. Eloko moko ekómi na mposa ya kozala lisusu elenge mobali. Eloko moko ezali... Okoki kopesa ata nini. Ngai nakolinga kosala yango. Ndeko Jack, ná biso nyonso. Kozonga, Ndeko Gerholtzer, oyo azali awa, na kati ya bolenge wana. Mpo na nini tolukaka yango? Kozonga elenge mpe kopota mbangu bipai na bipai lisusu? Te, misie! Mpamba te tomiyoki ete tokozala lisusu na ntango mingi ya kokumisa Nzambe oyo tolingaka.

²²⁹ Mpe bandeko na ngai ya bolingo, nazali na Nsango oyo na ntongo oyo, Mboka moko ezali na ngámbo ya ebale, babengi yango boboto ya libela. Kuna, tokokumisa Ye kati na bileko, mpe bileko nyonso, mpe na Seko-na-seko. Mpo na nini tozali komiyoka bongo? Mpo bozindo moko ezali kobenga Bozindo. Na ntango nyonso oyo bozindo ezali kobenga, Bozindo moko esengeli kozala mpo na koyanola na mbéla yango, soki te, mbéla moko elingaki kozala te. Liboso ekelamo ézala, esengeli liboso ete Mokeli ázala mpo na kokela ekelamo yango, soki te... Wana ezali kotalisa ndanga mpenza ete yango ezali.

²³⁰ Bótala banganzambe oyo, bango nyonso libanda na molongo. Bótala epakweli yango, malamu, epakweli yango ezalaki na mabe moko te. Ndenge moko na bino ba-Pantekotiste, kasi bókéba na nzela oyo bokómi kolanda sikawa. Mokolo ebongwani uta Pantekote, likambo mosusu ezali kosalema. Soki mosakoli moko ázalaka na mboka te, ntango mosusu Dawidi alingaki kozala na elóngá. Ya solo. Kasi Natana azalaki kuna, andimisami, abongisami, atitolami na Nzambe mpo na kozala mosakoli.

²³¹ Bótala malamu! Na Biblia, sanduku ezalaka ntango nyonso elíngí ya Liloba epai na biso, mpamba te ezalaki Liloba na Nzambe kati na sandúku. Mpe ezalaki... Bótala, sandúku oyo bayaki na yango, bótala ndenge bayaki na yango. Etiamaki te na esika na yango ya ebandeli oyo Nzambe abongisá. Sikawa, Nzambe alobáki awa kati na Mobeko ete esengeli... ndenge esengelaki kosalema, ndenge sandúku oyo esengelaki komemama, mpe esengelaki komemama na nani. Kasi Dawidi, na nsé ya epakweli na ye...

²³² Ndeko na ngai ya mobali, kozanga likambo oyo te. Mpe bandeko na ngai ya basi, bino baoyo bolingi kozala basi batei mpe bongo na bongo, bózanga likambo oyo te. Ata epakweli na yo ezali ndenge nini, esengeli kozala na esika oyo Nzambe

asilá kobongísa. Epakweli ya Dawidi ezalaki malamú, kasi na kosáláká yango, amemamaki mpe akatisaki mondélo. Asalaki nini? Akatisaki mondélo. Na esika ya kotia sandúku na esika na yango oyo esengeli, amemaki yango likoló na likálo ya sika, kasi likolo na mitema ya Baléwi te. Esengelaki komemama likoló na mapeka ya Baléwi, elingi koloba, likoló na mitema. Liloba ezalaka na motó te, Ezalaka nde na motema! “Likolo na likálo ya sika te.” Ezalaki nini? Eloko. . . Etalisaki eloko moko ya sika, likambo oyo Dawidi asalaki kuna, etalisaki denomination nyonso oyo ekozáláká. Liloba na Nzambe esengeli te kozala na. . . komemama na bayangeli bakonzi to ba-evéke, ná nyonso wana, ya ba-denomination. Ezali Libatisi ya Molimo Mosanto kati na motema ya moto, kasi na mouvement ya lingomba moko te. Molimo Mosanto ezali eloko ya motuya ya bolingo na Nzambe kati na mitema ya mibali mpe basi, mpo na kotósa. Bomoni?

²³³ Ezalaki likolo na mapeka ya batei na Ye, batei na Ye bazalaki Baléwi. Bazalaki kotia yango likoló na mapeka na bango ya loboko ya mwasi, bazalaki komema sandúku yango ndenge wana, mpo ezalaki likoló na mitema na bango. Bazalaki na mokumba ya Liloba na mitema na bango. Amen! Sikawa, yo ozali na mokumba ya denomination na yo na motema na yo, mokumba ya eyanganelo na yo: soki bokotonga *oyo*, to soki bokosala oyo *kuna*, to kosala eloko mosusu. Mokumba ya motángo ya bandimi oyo bokobakisa na denomination na bino; na esika ya mokumba ya Liloba ya Nkolo, ete bato wana bámóna bobee Liloba na Nzambe, kasi eloko mosusu te. Kasi sikawa botii Yango likoló na likálo ya sika. Bomoni? Bamemi Yango kuna, kutu na likita ya mangomba, likoló na mapeka. Naboi kopámela, Nzambe ázunga ngai sikawa. Nazali bobee koyebisa bino Solo.

²³⁴ Sikawa, lokola batindikamaki na bindimeli mpe na likita ya mangomba, Liloba, Liloba ya solosolo ya eleko mpo na eleko wana ekipamaki te, mpo bazalaki na kotúntuka mingi. Kasi Dawidi, mokonzi oyo apakolamaki. . . Azalaki mokonzi, kasi apakolamaki *mokonzi*. Bolobaka: “Nazali motei, napakólámá.” Boye, tikala motei, koluka kokóma mosakoli te. Bomoni? Soki ozali evangeliste, tikala evangeliste.

²³⁵ Bóbosana Uziya te, na mikolo ya Yisaya, elenge mokonzi. . . elenge mosakoli. Uziya azalaki moto monene, mopakolami, Nzambe apámóláká ye; amipambolaki ye moko. Iyo, nateyaki bino yango awa mokolo moko. Mokolo moko, amitombolaki mingi na lolenge ete akanisaki ete akokaki kosala mosala ya nganganzambe, azuaki móto mpe akendeki liboso na Nkolo. Mpe nga. . . Banganganzambe wana balobaki na ye: “Kosala bongo te, Uziya!” Kasi avímbaki na loléndo. Mosakoli akokaki koyebisa ye eloko moko te. Banganganzambe bayebaki lotomo na bango, bazalaki kobatela lotomo na bango, alobaki: “Wana ezali lotomo na yo te, Uziya. Kosala bongo te!”

236 Ee, alobaki na bango “Bókanga minoko!” Mpe amemaki mó—móto, akotaki mpo na kotumba mbeka, kosala mosala ya nganganzambe; ye apakólámáká mokonzi, nganganzambe te. Banganganzambe yango bazalaki komeka koyebisa ye: “Ozali mokonzi malamú mingi, opakólámá, Nzambe apamboli biso na nzela na yo. Kasi ozali mokonzi, nganganzambe te.”

237 Bino bakengeli, bosengeli ata moke te koyebisa mosakoli eloko oyo asengeli kosala, to bino ba-evangeliste epai na mokengeli. Bomoni, moto na moto azali na mosala na ye, soki etálísámi be mpenza.

238 Na bongo, akotaki kuna ná móto, abetamaki na maládi ya mába mpe akufaki.

239 Sikawa tala Dawidi ye oyo, mokonzi. Dawidi azali koluka kosala ndenge moko awa. Azuaki likambo yango ye moko. “Iyo, ezali mabe te, nasengeli kokende.” Abalukaki epai na bato: “Olobi nini, yo mokóló na nkóto? Ozali na basodá nkóto zomi.”

240 “Nkembo na Nzambe, Dawidi, nazali koyoka Molimo.” Oh, ayokaki! Ayokaki Yango mpenza. “Omoni ndenge nini, Dawidi? Ozali koyoka Yango?”

241 “Nkembo na Nzambe, Ezali na nzoto na ngai mobimba! Tótála yango mpo tóyéba soki ezali ya solo, tótala. Sandúku esengeli kozala wapi?”

242 “Elongo na biso! Esengeli kozala katikati na biso.”

243 “Tosengelaki kotuna toli epai na nani? Na ntembe te, epai na sandúku.” Ndenge moko mpe, mabelé wana ezalaki ya—ya Yisraele, kasi ya Bafilistia te. Ezali ya solo, ezali ya bango. “Ngai mpe nazali koyoka epakweli.”

244 Mikóló na nkama, eyanganelo mobimba: “Nkembo na Nzambe!” Babetaki maboko, bagángaki, babinaki mpe bapumbwaki-pumbwaki.

245 Bazalaki na Molimo, kasi bokanisi Tata azalaki kokanisa nini? “Nzokande Natindi Natana, mosakoli, kuna! Bayebi eloko basengeli kosala, Dawidi mpe ayebi, kasi sikawa, ye amemami mobimba, mpe aleki ndelo na ye mpe akei kosala likambo *oyo*.”

246 Malamú, bótala, “komema Yango likoló na mapeka” nde ezalaki mwángo ya ebandeli ya Nzambe. *Maséngeli* ezali mitano. Nalingi ete bókoma yango, soki bozali... Namoni ete bozali kokoma.

Tokómi ngonga ya zomi na miníti ntuku mibale, koleka miníti ntuku mibale, na bongo, nakomeka kosilisa liboso na ngonga ya zomi na moko, soki ekoki kosalema. Nakosala noki-noki mpenza ndenge nakokoka.

Ata moto azali na bosembo ndenge nini ntango azali kosalela Nzambe mosala, ata azali na bosembo ndenge nini, ata apakolami ndenge nini, ata azali Presbiterien, Batiste,

Pantekotiste ndenge nini; ata soki ozali evéke, mosungi, nyonso oyo ozali, mokengeli, mopalanganisi Nsango-malamu, mosakoli, to nyonso oyo ekoki kozala; ezali na maséngeli mitano oyo esengeli kotalema malamuliboso. Atá epakweli yango ezali boni, atá emonanaki malamul ndenge nini, atá bato bagángaki ndenge nini, na makambo nyonso oyo Molimo asalaka, ezali na *esengeli*.

247 Sikawa, bandeko na ngai, wana bozali kolengela nkasa na bino, bokoki kososola sikawa mpo na nini? Sikawa, bómikanisela, bino nyonso bokanisaki, mpe basilá kolakísa na bino, te... (bomoni, nazali koloba na ekólo mobimba)...ete ngai nandimaka minoko na sika te. Nandimaka mpenza minoko na sika, kasi okoki mpe koloba minoko na sika kasi ozali na yo na Molimo Mosanto te. Bakolinti ya Liboso 13, elobi: “Ata nalobi minoko ya bato ná ya banje, nazali bobele mpamba.” Bomoni? Wana ezali epakweli ya Molimo Mosanto, etali ata moke te elimo oyo ezali kati na yo. Okoki koloba minoko na sika mpe kowangana Liloba. Namóná yango kosalema, bino mpe bomóná yango. Bomoni? Mwasi akoki koteya Nsango-malamu mpe... Bomoni? Bakoki kosala nyonso... Bakataka nsuki na bangó, kasi ata bongo, bagángaka, balobaka minoko na sika mpe basalaka makambo mosusu nyonso. Iyo, ezali mpenza ya solo. Bosengeli kolóngobana na Solo ya Liloba.

248 Bótala! Ata moto azali na bosembo ndenge nini, ata Nzambe asalelaka ye ndenge nini, ata soko ye azali nini, asengeli kozala boye: asengeli kozala... Likambo oyo azali kolobela esengeli kozala na ntango oyo Biblia elobeli. Moto moko akoloba: “Ee, Mose, kalakala.” Nayebi oyo Mose asalaki, kasi yango te oyo Nzambe azali kosala lelo. “Ee, kalakala mpenza, eleki mibu ntuku misato, Luther alobaki...” Ekokaki kozala malamul, kasi yango te oyo Azali kosala lelo. “Ee, eleki mibu ntuku minei, Pantekote ekitaki.” Kasi yango te oyo Azali kosala lelo. Bomoni? Esengeli kozala na ntango na yango.

249 Esengeli kolóngobana na Makomi. Esengeli kozala na eleko na yango, ya mibale. Ya misato, esengeli kozala mpenza ndenge Liloba na Nzambe elobi ete ekozala.

250 Bolobaka: “Nkembo na Nzambe! Molimo Mosanto ekitaki likoló na ngai, aleluya, kaka lokola Esalaki na Mokolo ya Pantekote mpenza.” Kasi yango ekoki kozala ndenge mosusu lelo. Ekitaki mpe likoló na Dawidi, boye te? Na ntembe te, Ekitaki. Ekitaki likoló na Uziya, kasi ezalaki mabe! Bomoni, osengeli kokóta na bozindo koleka wana, sikawa. Bomoni? Osengeli kokóta na bozindo koleka wana. Sikawa, ésala bino mpasi te, bó—bózala bobele na limemia.

251 Mpe bótala, esengeli mpe koya na moto oyo Nzambe aponi. Oyo denomination eponi te, oyo bato baponi te, kasi kokokana na kopona ya Nzambe. Mpe soki nsango yango euti na Nzambe, emoniseli monene oyo euti na Nzambe, esengeli koya epai na

mosakoli na Ye. Sikawa, soki bolingi Likomi mpo na yango, ezali na Amosa 3:7. Bomoni? Sikawa, esengeli kozala bongo.

²⁵² Ezali na makambo mitano oyo esengeli kozala: Esengeli kozala na eleko na yango. Esengeli kozala na ntango oyo Nzambe alobaki ekozala. Esengeli kokomama na Liloba na Nzambe. Esengeli kozala na eleko ya ntango na Nzambe, bomoni. Mpe esengeli kozala kokokana na kopona ya Nzambe.

²⁵³ Mpe Nzambe azali na bosenga ya moto moko te kati na biso mpo na kolimbola Liloba na Ye, Nzambe azali Molimboli na Ye Moko. Azali na ntina ya mákindo na biso te. Azali na ntina ya bwanya na biso te, ezali bolémá. Bomoni? Ewa azalaki na yango, ah-ah, kasi azangaki Ndimbola yango likoló ya bwanya na ye.

²⁵⁴ Balobaka: “Oh, tala, mobali wana azali na mayele mingi.” Ee, ezali na ntina te. Ya solo mpenza. Akaba azalaki moto ya mayele mingi. Beleteshazare azalaki moto ya mayele mingi. Satana azalaki na bokosi mpe na kozanga bokóndé ya koleka mpenza, na mayele mabé, moko te kati na bino akokaki kotelemela ye, ata moko te.

²⁵⁵ Ngai natalelaka te...ata moko te...bwanya moko te, natalelaka bobele Nzambe. Bomoni? Nzambe azali ndenge nini? Azali Liloba. Na bongo, ndenge nini Nzambe alimbolaka Liloba na Ye Moko? Bóyoka malamú sikawa, bózanga makambo oyo te. Ndenge nini Nzambe alimbolaka Liloba na Ye Moko? Na kokokisáká Yango, bobele *moko* awa te, kasi *mobimba* na yango mpo na eleko wana.

²⁵⁶ Ezali te koloba: “Noa, kende koteya, ozali na mpémélá,” kasi: “Tóngá masuwa, tia bikuke kati na yango, bongisa yango lolenge *oyo*, mpe lolenge *oyo wana*.” Bongo soki átiaka ekuke na likoló, na esika ya kotia yango na nsé? Bongo soki átiaka lininísa na nsé, ekuke na likoló? Bomoni? Motíndo esengeli kopesama kokokana na ntango wana, mpo na ntina wana mpenza nde Nzambe akosalela yango. Esengeli kozala bongo, mpe esengeli koya na nzela na mpémélá.

²⁵⁷ Nayokaki mobali moko koloba ntango moko, alobaki: “Nandimaka moto wana abondelaka mpo na babeli, nandimaka ete ezali mabe te. Kasi na oyo etali kozala mosakoli,” alobaki, “nandimaka ete azali mosakoli ya Nzambe; kasi lokola molakisi, ee, azali moto ya ‘Jesus seul.’” Nani...Moto ya ndenge wana, bakoki kobenga ye nani? Moto oyo ayebi makambo oyo azali kolobela te.

²⁵⁸ Liloba oyo mpenza *mosakoli*, elingi koloba ete “azali momónisi ya Liloba na Nzambe,” ndimbola eyaka bobele epai na ye. Yango wana lelo, tokómi mpenza na bosenga makasi ya moto ya motuya wana, oyo asengeli kotindamela biso na lolenge ya mosakoli Eliya, mpo ekozala emoniseli ya Nzambe, oyo ekomonisama epai biso na nzela na kotatolama, kotalisáká ete ezali mokolo, ngonga mpe eleko oyo Nzambe alakaki yango

kozala bongo. Mpe, bómikanisela, bakoloba mabe na ntina na ye; ezalaka ntango nyonso bongo, ekozala ntango nyonso bongo. Bakoboya ye, kaka ndenge mposo ekolongwa... Na ebandeli, bakoyamba ye, mpo mposo ebombaka blé bobele kino ntango ekokóma na makoki ya kobima liboso na moi. Pantekote ekobatela bobele Nsango, ekofungolela Yango ekuke kino ntango Epalanganisama, na nsima, mposo yango ekokabwana, mpe blé ekotikala Liboso na Mwana, bomoni, mpo na kokomela.

²⁵⁹ Ekozala na denomination moko te, bóbósana yango te. Ndeko Jack oyo azali historien, mpe mingi kati na bino awa bozali bongo. Etikálá kozala na kolamuka moko te kozanga ete, pene na mibu misato nsima na kolamuka yango, bábanda denomination uta na yango. Ezali solo? Mpe mouvement monene oyo ya Nzambe, ya nsuka mpe ya bikámwa, na mikolo oyo ya nsuka, ekokisi mibu ntuku mibale; kasi ezali ba-million na ba-kilometre mosika na kokóma denomination, ezali ntango nyonso kokende mosika na yango; mposo ezali kokabwana, kozanga lisungi, bazali na ntina na Yango te. Bomoni? Ezali ntango nyonso kokabwana na Yango. Ekoki lisusu kosalema te, esili tokóma blé sikawa. Kasi tozali naino mobésu mpenza. Ah-ah. Ya solo. Tosengeli kotikala Liboso na Mwana mpo tókóma petepete, nde nyonso oyo esengeli. Mobésu mpenza; tozangi bosembo, bosantu, eloko oyo tosengeli kozala na yango katikati na biso, koyeba ete Molimo na Nzambe na bomoi ezali kosala kati na Liloba na Ye mpe ezali naino kotalisa biso makambo oyo.

²⁶⁰ Bamekoli ya lokuta batelemi. Mpo na kosala nini? Mpo na kopéngwisa. Biblia elobaki ete bakosala bongo. “Lokola Yanesi ná Yambresi batelemelaki Mose, ndenge moko mpe na baoyo, na ntango ya nsuka.” Bomoni? Bazali kosala ndenge moko, bazali koya komekola Yango, ndenge moko mpenza. Bomoni? Bókéba! Bótala malamú Malakisi ya Biblia. Bótala malamú nsango oyo ezali kolanda bilembo yango! Bobele nsango moko ya eteyelo oyo ya kala? Bóbosana yango!

²⁶¹ Nzambe atindaki bikamwa mpe bilembo mpo na kobenda bokebi ya libota na Ye. Ntango Yesu ayaki, kobikisáká babeli, mpe nyonso wana, pelamoko ná basakoli. Bamilobelaki: “Oh, nkembo, Azali koya, Akozala Mofalisai. Akozala Mosadukai.”

²⁶² Kasi Ye alobaki: “Bino libota ya banyoka mpe bitúpa.” Alobaki: “Bouti na tata na bino zabolo, misala na ye nde bolingi kosala.” Alobaki: “Soki bolei mosuni ya Mwana na moto te, mpe bomeli Makila na Ye te, Bomoi ezali kati na bino te.” Alimbolaki Yango te. Azalaki na ntina ya kolimbola Yango te. Aleluya. Wana ezalaki mpo na eleko mosusu. Ah-ah. Alobaki bobele oyo Asengelaki koloba: “Nasalaka ntango nyonso oyo esepelisaka Tata, elingi koloba kotósa Liloba na Ye. Soki Nasali te, soki bomoi na Ngai ná misala na Ngai ekokani te ná Liloba na Ye oyo Nasengeli kosala, na bongo bóndima Ngai te, Nazali Ye te; kasi

soki ekokani, na bongo bóndima misala, soki bokoki kondima Ngai te,” Alobaki.

263 Bótala sikawa *maséngeli* oyo, oyo esengeli kosalema.

264 Sikawa, bomoni, Nzambe amonisaki bango likambo yango te, na nzela oyo Ye abongísáki, Amonisaki yango na nzela ya mpémélá, kasi ezalaki na nzela oyo elongobani te. Bomoni, mpémélá ekotambola malamú, kasi soki eyei na nzela oyo elongobani te, ekokambama mabe. Ndakisa, soki ozui lisasi mpe obeti yango sémba na eloko oyo okáni kobeta, ezali kopasola nzela na yango semba na eloko okani kobeta, kasi mopepe ekoki komema yango pembeni. Sikawa, na motuka na yo, soki ozali kotambola na lombangu ya kilometre nkama to nkama na ntuku mibale na ngonga moko, mpe mopepe ebeti yo, okoki kosémbola bapiné mpo na kozongisa motuka na nzela. Kasi okoki kosala yango na lisasi te; ezali na eloko moko te kuna mpo na kosémbola bapiné na yango, ekobeta pembeni na eloko okáni kobeta. Bomoni, esengeli kolanda nzela na yango ya ebandeli.

265 Ndenge moko mpe, Liloba na Nzambe esengeli kolanda nzela na Yango ya ebandeli. Ata mwa mopepe moko te ekopepa Yango pembeni; mwa denomination moko te, to eloko moko te ekopepa Yango pembeni; mwa minióko moko te ekopepa Yango pembeni: Etindami sémba na esika yango! Ekobeta kuna mpe. Na bongo Nzambe, ntango Ekobeta eloko yango, Nzambe akotatola Yango: “Na katikati mpenza!” Ah-hah, ezali mpenza likambo oyo Alobaki ete Akosala. Yango oyo na kati na Makomi, ezali: “YANGO ELOBI NKOLO: ‘Ekosalema!’” Yango oyo. Bomoni? Yango mpenza.

266 Sikawa, Nzambe amonisaki yango te na nzela oyo Abongísá. Na bongo, bakendeki kosala yango libanda na Liloba na Ye, mpe libanda na eleko na yango, bobele ndenge bazali kosala sikawa. Ntango bato, ata bazali sembo ndenge nini, bamekaka kosalela Ye mosala libanda na nzela oyo Abongísi, bakotisaka ntango nyonson mobulu na makambo. Lokola Balaama, Balaama akanisaki ete azalaki kosalela Nzambe mosala.

267 Bokanisi ete Nzambe akosaka? Nzambe ábongolaka mpenza makanisi na Ye? Ee, lelo, bato bazosala makambo lokola Asalaki bongo. Na ntango oyo Alobaki ete basi bákata nsuki na bango te; bango balobi: “Tokoki kokata yango, Molakisi *Songolo-pakala* alobaki ete tokoki kokata yango. Ndeko *Songolo-pakala* alobaki ete yo ofungwámá te.” Ah-ha, ah-ha. Bomoni?

268 “Ee, likambo *yango* ekoki kosalema? *Oyo* esalema?”

269 “Iyo, ah-ha, *Songolo-pakala* alobaki bongo.”

270 Nzambe abongolaka makanisi na Ye te.

271 Bondimaka ete Balaama azalaki mosakoli? Biblia elobi ete azalaki yango. Bondimaka ete azalaki mosakoli? Sikawa, bómikanisela, Balake ayaki epai na ye mpe alobaki: “Kende

kolakela libota oyo mabe, mpo batondi na mokili mobimba. Bazali ata denomination te, ekólo te, bazali bobele etóngá oyo epalangani; mpe biso nde bato ya lokumu na mboka. Sikawa, kende kuna kolakela libota yango mabe, mpe nakofuta yo mpo na yango.”

²⁷² Mpe Balaama asalaki mpenza ndenge mosakoli asengeli kosala, alobaki: “Nakokende te. Zela naino awa, tólekisa butú ya lelo, mpo náyeba eloko nini Nzambe akoloba ete násala.”

²⁷³ Na bongo akotaki, alobaki: “Nkolo, ezali bato moko awa bayei elongo na ngai, balingi ngai nákende kolakela mabe libota mosusu kuna na nsé.” Alobaki: “Olingi ete násala nini mpo na yango?”

²⁷⁴ Nzambe alobaki: “Kokende te, mpamba te bango bazali libota na Ngai!”

²⁷⁵ Balaama abimaki, alobaki: “Bózonga epai na bino. Nakoki kokende elongo na bino te, Nzambe ayebisi ngai ete násala yango te.” Sikawa, yango nde Liloba na Nzambe ya ebandeli: “Kokende te!”

²⁷⁶ Ee, boye bazongaki, balobaki: “Oyebi, évéke na yo alingi koyoka te.”

²⁷⁷ “Ee,” mokonzi alobaki, “tokosala boye. Azali na bosenga ya mwa mbongo, nabanzi yango ekondimisa ye. To ntango mosusu nakokómisa ye surveillant general, ntango mosusu nakopesa ye mosala moko ya monene ya kosala. Ntango mosusu nakokómisa ye évéke, bokoki koyeba te makambo oyo nakoki kosala. Tala, nakoyebisa bino eloko nini nakosala. Kútu, bino botángá mingi te mpo na kondimisa ye; ba-*his*, *hain't*, *tote*, *fetch*, *carry* na yo [Ndeko Branham asaleli maloba ya Anglais ya Kentucky.—Mok.], ezali malamú te. Akoyukela bino te, tokotindela ye bato oyo batángá mpenza, ya lokumu koleka.”

²⁷⁸ Bakendeki kuna, balobaki: “Molakisi Balaama, *Molakisi* Balaama, mbote na yo. Namemeli yo bambote ya mokonzi.”

²⁷⁹ “Mbote, bandeko.” Bomoni?

²⁸⁰ “Sikawa, Molakisi Balaama . . .” Mpe, oh, maloba, esopanaki mpenza lokola mbula. Mpe balobaki: “Sikawa, mokonzi alobi ete akomatisa yo, mpe akopesa yo lokumu monene. Mpe, oyebi, bango balobaki ete bakofuta yo bobele misolo *boye* mpo na kosala mosala yango, kasi mokonzi alobi ete akoyikanisa yango mbala misato, mbala minei, soki okolinga koya kosala mosala yango.” Bongo likambo yango epesaki Balaama mwa mokosa. Azuaki makanisi ya bolémá mpe abongolaki makanisi na ye.

²⁸¹ Sikawa, bóbosana te, abelelaki Nzambe na nzela na epakweli, kasi alongolaki Nzambe na mwángo ya ebandeli. mpe yango mpenza nde ba-Pantekotiste basili kosala! Mpo na koyebana, bino ba-Unitaire, bino ba-Trinitaire, mpo na koyebana, bokómi denomination, mpo na kokesana, bokómi

ebongiseli mpe bokufi! Bokotelema lisusu te. Kasi, bomoni, bosengelaki kokangama na oyo Nzambe abongísá uta na eband- . . . Abimisasi bino na Assemblée wana mpo na kokómisa bino libota, kasi bokómi ebongiseli mpe bozongi bobele na bisánzi moko (bólimbisa ngai), oyo bobimaki na yango, likambo moko oyo bobimaki na yango: “Ndenge mbwa ezongaka na bisánzi na yango, mpe ngulu na potopóto na yango.” Bólimbisa ngai ndenge nalobi bongo, bólimbisa ngai, ezali malamau te, awa na etumbelo. Bomoni? Nalobi yango bobele na mosuni. Bótala, sikawa . . . yango nde nalingi koloba, kosánza. Nasengelaki koloba yango ndenge wana. Liloba yango ezalaki mabe te, kasi esalelami malamau te. Bomoni? Esalelami mabe te, kasi eyokani malamau te, boyebi. Bisánza: “Ndenge mbwa ezongaka na bisánza na yango.”

²⁸² Soki ba-Assemblée de Dieu, Conseil General, bakómisaki Pantekote ebongiseli, na ebandeli, mpe bamemaki bango na kati na yango, na lolenge ete bakokaki lisusu kondima bimoniseli te, boyebi te, bino ba-Unitaire, ete bosili kosala ndenge moko? Ndenge nini bokokaki koyamba Nsango ya “momboto na nyoka, kobatelama ya Seko,” ná makambo mosusu oyo epesami? Bokómi ebongiseli ya makasi mingi na lolenge ete bozoboya ata ete Ékota na ekuke na bino, ah-ha, ah-ha, likambo moko oyo Balaama asalaki. Kasi Nzambe abongolaki likanisi na Ye te.

²⁸³ Boye Balaama akendeki kuna mpe alobaki: “Nkolo, sikawa tala, nazui mpenza libaku malamau ya kokóma moto monene. Oyebi ete nazali moto mpamba, kasi nazui libaku malamau ya kokóma moto monene. Olobi nini mpo na yango, Nkolo?” Sikawa, asengelaki koloba bongo ata moke te! Ayebaki mpenza oyo Nzambe alobaki ásala!

²⁸⁴ Ezali mpe bongo mpo na moto nyonso oyo abatisámá na nkombo “ya Tata, Mwana mpe Molimo Mosanto,” ná makambo mosusu oyo ya Biblia, oyo esengeli kozala na mokolo oyo, boyebi oyo bosengeli kosala na ntina na Yango, ezali koyamba Yango! Ntango bomoni Nzambe kotatola polele ete “Ezali Solo,” wana ezali Nzambe kolimboláká Liloba na Ye Moko. Kasi bokosala yango? Te, ebongiseli na bino ekotika te ete bósala yango!

²⁸⁵ Batei mingi, kuna na Tucson, bazali koyoka na ntongo oyo. Ndeko Gilmore, nazali na eloko ya kotelemela yo te; Ndeko Brock, ya Première Assemblée, ná église Amicale. Bino bandeko, nazalaki kuna ntango nyonso, botikaki ata te ete nákota. Ngai . . . Na ntembe te, bokokaki te, bokoki kosala yango te mpe bótikala ndenge bozali. Bokoki koyamba emoniseli te, mpo bokómá denomination. Mpe bóyoka, bobele ndenge Uziya abomamaki mpo azalaki na nse ya mpémélá ya lokuta, ndenge moko mpe Baklisto ya solo mingi bazali kobungisa lobiko na bango, kuna na mwa ba-denomination wana oyo ekúfa, mpo bazali kotia maboko na bango na Sandúku, na ntango oyo babongísámá te mpo na kosala bongo. Sikawa, bokoki kondima

Yango, to kondima Yango te, etali bino. Nzambe nde Mosambisi na bino. Nzambe atikálá kozóngela Liloba na Ye te. Oyo Alobaki mbala ya liboso, Akoloba bongo mbala nyonso.

²⁸⁶ Alobaki na Balaama: “Kokende te!”

²⁸⁷ Na nsima Balaama ayaki lisusu, alobaki: “Kasi, Nkolo, nakoki kokende?”

²⁸⁸ Sikawa, bótala! Nzambe alobaki: “Kende!” Sikawa, Apesaki ye nzela ya kokende. Wana ezali mokáno na Nzambe ya ndingisa, kasi mokáno na Nzambe ya ebandeli te. Bomoni mobulu oyo akotaki kati na yango?

²⁸⁹ Mpe moto nyonso oyo atongi eloko moko, ebongiseli moko, to eloko nyonso oyo etongami likolo na Liloba na Nzambe te, ezali zelo ya kozindisa, mpe ekokweya! Ekokufa lokola mpenza eloko nyonso, mpo Liloba na Nzambe ezali Nzoto ya Mwasi na libala oyo ezali kokóla. Okoki kozala na Yango te nyonso lokolo, nyonso loboko, nyonso ebelo. Makambo oyo eyaka na eleko na yango.

²⁹⁰ Mpe bino ba-Pantekotiste, bokómisi yango nyonso eloko moko, yango wana bokoki koyamba emoniseli ya sika te. Yango wana botikali esika bozali, mpe bokufi. Yango ekendeke liboso. (Eleki mingi; naboi kolembisa bino.) Kasi Nzambe abongolaka makanisi na Ye te, mokáno na Ye ya liboso ezalaka mpenza malamumu. Boye, Nzambe abongolaka makanisi na Ye te, Akotika yo ete ókende liboso, na mokáno na bino ya ndingisa. “Nzambe azali Nzambe malamumu,” ndenge Oral Roberts alobaka. Azali mpe Nzambe ya nsómo!

²⁹¹ Bótala, kaka ndenge bolobaka: “Nkembo na Nzambe, nalingi koloba minoko ya sika!” Akotika yo ósala yango, kasi elakisi ata moke te ete ozali na Molimo Mosanto.

²⁹² Bozali komikanisela likambo oyo Toma alobaki, mobange mobeti-ntembe oyo? “Bobeke nazua ndangá moko, nasengeli kotia misapi na ngai na nsété na Ye, na maboko na Ye, mpe na mopanzi na Ye, na—na—na—nakondima Yango ata moke te.” Sikawa, ezali yango mpenza, ndenge moko.

²⁹³ Yesu alobaki: “Tala, Toma, boye, tia maboko na yo awa, soki yango nde olingi koyeba.” Bomoni? Bomoni? Sikawa, soki olingi kolanda nzela ya Toma, kende liboso. Kasi Alobaki nini? “Libonza ya monene koleka ezali mpo na baoyo bamoni ata moke te kasi bandimi.”

²⁹⁴ Bótala, bótala, na kosaláká bongo, abomisaki moto moko ya bosembo, atiaki loboko na ye na sandúku, na ntango asengelaki kosala bongo te. Moto monene, ya bosembo, akanisaki ete epakweli mpe makambo nyonso ezalaki malamumu, kasi sandúku ezalaki kokende na nzela na yango ya mabe. “Bangombe,” Biblia elobi, “babetaki libaku,” ezalaki Baléwi te. Bangombe nde babetaki libaku, mpe likálo elingaki kokweya; mpe moto ya bosembo, ná motema na ye etondi na bolingo, atiaki loboko na

ye na sandúku yango mpo na kozongisa yango, kasi abetamaki na kufa mpo moto moko te akokaki kosimba sandúku yango, longola Moléwi. Bomoni ndenge Nzambe abatelaka Liloba na Ye, abatelaka nzela na Ye ya kosala, abatelaka motindo na Ye? Uziya abetamaki na maláli ya mába. Tala Dawidi, abomisaki mpenza moto, mpe ezalaki likámá monene; bango mibale bapakolamaki na Molimo, kasi ezalaki libanda na nzela ya Nzambe. Ezali solo? Akufaki. Oh, ebangisaki Dawidi mingi mpenza, esika yango bapesaki yango nko—nkombo, ndenge Ndeko Jack atángaki yango. Bomoni? Abendaki bokebi na ye wana.

²⁹⁵ Mbala boni ba-denomination esili kosala makambo ndenge moko epai na bandimi ya bosembo. Lingomba Katoliko, Metodiste, Batiste, eglise de Christ, ata ba-Pantekotiste, babomisi bato mingi na molimo bobele na likambo yango moko. Ntango Esalemaki, ná makambo oyo, bamonaki. . . mpe bakokaki kokende mosika te, mpo yango nde oyo denomination na bango endimaka.

²⁹⁶ Bótala lelo, ba-campagne minene, makambo ndenge moko. Bazali kosala eloko mosusu te, bobele kokómisa bango “bana na lifelo mbala mibale, bato mabe koleka ndenge bazalaki liboso.” Ekómeli bango mpenza mpasi mpo báya na Solo. Ntango basálaka mayangani minene ya kolamuka, bango nyonso bayáka, basalaka bisálélé mwa moke, mpe bazongaka mpo na kozongela masumu nyonso wana. Soki bayoki nsango ya kolamuka mosusu, balobi: “Ah, nasilá koleka na makambo wana, nameká yango. Ezali na ntina moko te.” Bomoni? Bayebi nzela ya koleka te. Bazali komona te.

²⁹⁷ Nayokaki evangeliste na biso monene, Billy Graham, na ntongo moko, tozalaki kolia na ntongo lokola boye, mpe alobaki: “Ngai. . .” Atombolaki Biblia, awa na Louisville, na Kentucky, alobaki: “Tala Ndakisa ya Nzambe.” Mpe ezali ya solo, mobali yango alobaki solo. Alobaki: “Bokendeke. . . Polo akendeke na engumba moko mpe moto moko abongolaki motema, azongaki kuna nsima na mobu moko, mpe azalaki na bato ntuku misato, uta na moto oyo abongolaki motema.” Alobaki: “Kasi ngai, nakei na engumba moko, mpe bato nkóto ntuku misato babongoli mitema, kasi nazongi kuna nsima na sanza motoba, nazokoka komona ata bato ntuku misato te.” Alobaki: “Boyebi ntina?” Alobaki: “Ezali bino batei ya goigói,” alobaki, “bofandaka, botii makolo likoló na mésa, mpe—mpe bobéngaka bato yango na telephone, na esika ya kokende kotala bango nsima na bilei ya mpokwa mpe kosolola na bango.”

²⁹⁸ Oh, motema na ngai ezalaki kopela móto. Namilobelaki: “E moto monene ya Nzambe, naboi kozanga koyokana na yo mpo na yango, kasi nani azalaki matei ya goigói mpo na moto oyo abongolaki motema uta na Polo? Oyo ye asalaki ezalaki ete, amemaki ye na kati na Liloba, amemaki ye na kati na Nsango, amemaki ye kino na esika oyo akutanaki na Nzambe; motema

na ye epelaki móto, mpe ye apelisaki móto na mboka mobimba! Kasi eloko bobele moko oyo bino bosalaka ezali kokotisaka bango na lingomba Batiste to Metodiste, to na eloko moko, bókámwa te soki eloko ya kopelisa ezali te.” Ah-ah. Iyo, misie!

²⁹⁹ Na bongo bótala oyo Liloba elakaki mpo na lelo. Tótala soki ezali lingomba Metodiste, Batiste, Pantekotiste, to eloko nini, mpo na lelo. Sikawa bokoki kokende kotánga Makomi na bino. Bózua Makomi oyo nauti kotángela bino. Emoniseli mpe. . .

³⁰⁰ Soki nazalaki na ntango, nalingaki kotánga yango, kasi nazali na yango te. Natikali na miníti pene na zomi na mibale to zomi na minei. Nasengeli kosilisa na ntango esengeli, na ngonga ya zomi na moko, soki nasilisi malamau.

³⁰¹ Bótala Malaki 4, Emoniseli 10, Bilembo Nsambo. Biblia elobi te ete. . . Sikawa bótala malamau! Mwanje moko, Motindami moko autaki na Likoló, ná motindami ya mabelé. Mpe motindami moko moko azalaki kotindama na eleko ya lingomba. Alobaki: “Na mikolo. . .” azali koloba sikawa, “Mwanje moko akitaki, Motindami” (liloba oyo *mwanje*, na Anglais, elingi koloba “motindami”). “. . . akitaki uta na Likoló, Atiaki lokoló na Ye na mabelé mpe na mbu, mpe alápaki na Ye oyo azali na bomoi bileko na bileko ete ntango ekozala lisusu te.” Ezali solo? Monama ezalaki zinga-zinga na motó na Ye, mpe makambo nyonso oyo esalemaki. Mwanje yango ezalaki Klisto! Na ntembe te! Kasi Alobaki nini? “Kasi na mikolo ya mwanje na nsambo, na eleko ya nsambo ya lingomba.”

³⁰² Esalemaka ntango nyonso na nsuka mpenza ya eleko ya lingomba, esika makambo ekómaki mpenza. . . bakonzi ya lingomba bakotisaka mobulu mingi na lolenge ete Nzambe atindaka motindami, mpe yango nde Nsango mpo na eleko ya lingomba wana. Na sima bazuaka nsango na ye, mpo abikaki bobele ntango moke, mpe Nzambe. . . bongo bazuaka nsango na ye na esika ya kokende liboso ná mobimba na Yango, basalaka de—denomination. Na bongo bayaka kosala denomination mosusu; motindami mosusu, kokamata mosusu.

³⁰³ Bino nyonso bokomona yango na buku na ngai, nyonso ekolimbolama na bolai na *Bileko Nsambo Ya Lingomba*, ndenge Ayebisaki ngai; nakangami na yango lokola nzeneneke liboso na Nzambe, mpo na kosambisama kokokana na Yango na mikolo ya Kosambisama. Euti na Nzambe, na makanisi na ngai te. Bótala, awa. Ngai nazalaki kokanisa—nazalaki kokanisa bongo te, soki nasengelaki kozala na makanisi na ngai moko. Ndenge Ndeko Jack ayebisaki ngai na ntina na Mwanje, kuna, ete “Klisto wana, ezalaki nzoto oyo ekembisami.” Kasi ezalaki bongo te, ezalaki kotalisa ete Nsango ezali solo, Bonzambe ya Likoló koleka, ete Azali Nzambe. Bomoni? Bobele likambo mpenza oyo nazalaki koteya uta na Liloba. Liloba etatolaka ntango nyonso Liloba.

304 Sikawa, noki-noki sikawa, wana tolingi tósilisa, nsima na mwa ntango.

305 Sikawa, Alobaki: “Na mikolo ya Nsango ya mwanje ya nsambo, mwanje ya mabelé, eleko ya nsambo ya lingomba, na bongo mabombami oyo nyonso, oyo ebungaki na bileko motoba ya lingomba oyo, esengeli komonisama na ntango wana.” Ee, yango mpenza ndé oyo Banje wana balobaki. Bilembo Nsambo yango oyo, to bofungwami ya mabombami yango. Mpe bómeka naino koteya Yango liboso na ba-denomination wana. Ekesani na oyo bango... Ndeko, bakomikanga lokola huître, kasi, basalaka ntango nyonso bongo. Kasi ezali eleko yango!

306 Bato boni bayebi ete oyo nde eleko ya nsambo ya lingomba? Bóloba: “Amen.” [Losambo balobi: “Amen!”—Mok.] Eleko ya Laodikia, bobele mwa molunge, oyo Nzambe asanzi na monoko na Ye. Bango mpe basanzi Nzambe na monoko na bango; eleko mosusu ezali te, na Biblia, oyo bakuti Yesu libanda, koluka kobeta ekuke, kozonga na kati. Batie Ye libanda, boyokani moko te. Yesu azali Nani? Liloba! Liloba etiami libanda. Mposo eboi mbuma ya blé! Alobaki: “Natelema na ekuke mpe kobeta, mpe moto nyonso oyo akangami na minyolólo wana, oyo akoyoka Mongongo na Ngai.” E Nzambe, yoka mawa!

307 Ezalaki na ntango wana, ntango moto wana akufaki, nde Dawidi, ná epakweli, amonaki ete oyo ye asalaki ezalaki libunga. E Dawidi, yo mokengeli, okoki komona te bindimeli mpe denomination na bino oyo ekúfá, nde okangami na yango? Okoki komona te oyo yango ezali kosala? Ezali koboma Uziya. Bokufi na molimo, mpe bozali komituna mpo na nini kolamuka ezali te; wana bozali kotika basi na bino bákata suki, bápakola-pakola, báláta ba-kupé; kotinda bana na bino ya mibali na kelasi ya ba-*ricky*, mpe nyonso ndenge wana, epai ndambo kati na bango bazongaka wana basili kokóma ba-homosexuel ná nyonso wana.

308 Bótala ntina oyo Dawidi azalaki kolanda: azalaki komema sandúku na ndako na ye *moko*. Ezalaki engumba mokonzi te, ezalaki esika oyo esengelaki te, esengelaki kozala na Yelusaleme. Kasi Dawidi azalaki komema yango na ndako na ye moko, alingaki ete kolamuka ésalema na denomination na ye moko. “Oh, soki bozali ba-Assemblée, malamú. Soki bozali ba-Unitaire, malamú. Soki bozali ba-Pantekotiste, malamú.”

309 Lokola moto moko alobaki, alobaki: “Ndeko Branham, ndenge nini okozua bato mpo na koyoka yo?” Alobaki: “Namonaka Billy Graham, denomination nyonso ya ekólo ezalaka ná ye. Namonaka Oral Roberts, ba-Pantekotiste nyonso bazalaka ná ye. Kasi,” alobaki, “yo otelemelaka likambo mobimba.” Ah-ha. Alobaki: “Ndenge nini okoki mpenza kozua bato?”

310 Nalobaki: “Ezali Nzambe!”

³¹¹ “Ngai Nkolo nde nalonaki yango liboso na kozalisama ya mokili. Nakomwangisela yango mai butu moi, mpo moto moko te ábótola yango na loboko na Ngai,” Yisaya. “Ngai nde nakomwangisela yango mai, Ngai nde nalonaki yango. Natiaki nkombo na bango na Buku liboso na kozalisama ya mokili, na nzela na kobongisama liboso. Nakomwangisela yango mai, yo kóbá bobele kokende liboso. Ngai nde nakopesa mai, yo kóbá bobele kopanza Yango.” Ya solo. Bomoni? “Ngai nde nakomwangisela yango mai butu moi, mpo moko na bango te ábótolama na loboko na Ngai.” Ezali yango mpenza.

³¹² Alingaki ete éyá na engumba ya Dawidi, na esika ya Yelusaleme. Esika moko te ebongisamaki mpo na yango na eleko wana, ezali mpe bongo lelo. Mabombami minene oyo, oyo esili kozipolama na nzela na Bilembo Nsambo, ezali ata esika moko te na bibongiseli nyonso. . . esengeli kotika kozala denomination mpo na koyamba Yango. Kobanda na Luther kino na ba-Unitaire ya ba-Pantekotiste, esika ata moko te ekoki koyamba Yango. Moto moko mpe te akoki koyamba Yango, mpe átikala na denomination na ye. Asengeli kolanda mbuma ya blé, to kokende elongo na mposu, moko to mosusu, ndenge alingi.

³¹³ Klisto azali Sandúku na biso, Liloba. Bango balingi denomination na bango. Akoki te, bótala, Akoki te komemama na makálo ya sika ya denomination, Nsango na Ye ekoki te komata na likálo ya denomination ya sika, na ntango oyo Esengeli komemama mpe komata likoló na motema ya mosakoli. Ekoki kosalema te. Alakaki yango, ete Ekozala bongo, mpe Esengeli kozala bongo.

³¹⁴ Boye, denomination ekoyamba Yango ata moke te, bakoki mpe koyamba Yango te. Miso na bango ezipami liboso na Yango, lokola Bayuda, ntango babákaki Yesu na ekulusu, ntango Yesu alobaki: “Tata, limbisa bango, bayebi ata eloko bazali kosala te.” Bótiolaka bango te, kasi bókanisa: bongo soki yo nde ozalaki na lolenge moko wana, ná miso ekúfá mpenza na lolenge ete okoki kolamuka te mpo na komona likambo oyo ezali kosalema?

³¹⁵ Bango mpe bakokaki komona te ete Wana ezalaki Nzambe na bango mpenza. Ntango Azalaki kuna, na ekulusu, bango bazalaki koyemba Nzembo 22 na tempelo, na ntáká ya metre nkama mibale: “Nzambe na Ngai, Nzambe na Ngai, mpo na nini Otiki Ngai? Batoboli makolo na Ngai mpe maboko na Ngai.” Bomoni? “Mikuwa na Ngai nyonso, bazali kotala Ngai. Mpo na nini Otiki Ngai?” Mpe kuna, Nzambe mpenza oyo bautaki koyembela, bazipamaki mpenza miso na lolenge ete babákaki Ye na ekulusu, kasi bazalaki koyeba yango te.

³¹⁶ Sikawa, Biblia elobi te ete lingomba ya Laodikia, oyo ekanisaka ete ezali na lokumu mingi mpo na bandimi ya denomination na bango, ekozala “bolumbu, moto na mawa, mobólá, mokúfi miso, kasi eyebi yango te”? *Mokúfi miso* elingi

koloba nini? *Mokúfi miso*, mpo na lingomba ya Laodikia, elingi koloba, ndenge lingomba ya Bayuda esukaki, ezipamaki miso liboso mpenza ya Klisto, oyo babimisaki libanda, ákobetaká ekuke mpo na koluka kokota; “bolumbu, bato na mawa, babólá, bato na bolózi, bakúfi miso, kasi bayebi yango te.” E Nzambe, yoka mawa!

³¹⁷ Mpo na nini mbuma ya blé ekoki kozala Liboso na Mwana wana te, mpo émóna ntango oyo tozali kobika kati na yango? Iyo, Klisto azali Sandúku na biso, kasi azali na lolenge na Ye ya ebandeli, ya kosala makambo. Bongo, Ye oyo... Bazalaki mpenza na Molimo na Ye, wana toyebi yango. Batalelaka Nkolo, mpo na komona mwángo na Ye na ntina na Liloba na Ye ya ebandeli, ete ekokisama na eleko na Yango, yango nde tosengelaki kosala sikawa. Mpe A—Amonisaka kondima na bango na nzela na Liloba na Ye, ntango bamonaka Ye kotatola miango nyonso oyo Alakaki, miángo ya denomination ya bato te, kokómisáká bato bandimi ya sandúku na biso moko te.

³¹⁸ Bazali na sandúku ya ba-Methodiste, sandúku ya ba-Batiste, sandúku ya ba-Presbiterien, bato nyonso bakokota na sandúku yango, mpo na minyóko monene oyo ezali koya; “Nkembo na Nzambe! Nabatisámáki na sandúku ya ba-Methodiste, ya ba-Presbiterien, na sandúku ya ba-Pantekotiste.” Sandúku ezali bobele moko: Yesu Klisto, mpe Ye azali Liloba!

³¹⁹ Bótala, Nzambe ayebisaki mosakoli, alobaki: “Lia mokanda yango,” na Kondimana na Kala. Epai na mosakoli ya Kondimana na Sika, Alobaki: “Lia buku moke yango.” Mpo na nini? Mpo mosakoli ná Liloba bákóma moko! Bomoni? Yango nde Sandúku, Liloba na Nzambe.

³²⁰ Nzambe alakaki, Liloba na Ye, ndenge Ekokokisama mpe ndenge Ekosalema ntango Akopona Mwasi na libala na Ye, ndenge ekosalema. Ezali kosalema liboso na bino mpenza, na Nkombo na Nkolo, mpe ezali kosalema na nzela na Liloba ya ebandeli! Nsango ya ntango na mpokwa yango oyo.

³²¹ Bato boni bazali koyeba lisusu Haywood, ntango akomaki:

Na ntango na mpokwa, Pole ekozala,
Na ntembe te, bokomona nzela ya Nkembo.

³²² Iyo, elaka ya mpokwa, ya Bilembo Nsambo, ya Emoniseli 10, ya Malaki 4, ya Luka 30 mpe 10. Bótánga Dutelonome 4, 4:1 mpe 4, na nsima, molongo ya 25 mpe ya 26, bokomona ndenge Alobaki mpo na ntango oyo ya nsuka. Oyo ezali Mose moto azalaki koloba na Yisraele ete “bótósa Liloba mobimba, bómeka kobakisa eloko moko te!” Mose, mosakoli yango, autaki kozala na likoló kuna, mpe amonaki Liloba na Nzambe wana. Mpe Yango ekomamaki epai na ye mpe etatolamaki na loboko ya Nzambe oyo akomaki Yango Ye moko. Alobaki: “Bótósa Liloba moko na moko, bóbakisa eloko moko te likoló na Yango, to

kolongola eloko moko kati na Yango.” Bokoki kotánga yango na molongo ya 25 mpe ya 26 ya Dutelonome 4.

³²³ Bótala! Kobakisa likolo na Yango te, kolongola na Yango te; mpo soki osali bongo, Nzambe akolongola eteni na yo na Buku ya Bomoi. Mpe ezolakisa ete ozalaki na yo momboto na Ye te.

³²⁴ Bóbosana te! Nyonso oyo Nzambe alakaki biso, nyonso oyo Nzambe ayebisaki biso, nyonso oyo bayebisaki bino na Nkombo na Nkolo, esili kokokisama! Nzambe atikálá kopésá te elaka ya mpamba, kasi, Akokisaka bilaka nyonso oyo Alobaki, oyo Ayebisaki biso, ete ezali Solo. Mibu ntuku mibale ekoki, Shreveport, oyo nazali koteya bino na nguya ya Nzambe, mpo na bobóto ya mokengeli na bino, mpe nazui bino lokola nzeneneke lelo. Ata basi oyo basilaki koleka mibu ya kobota; mibali, bana, batengumi, lobiko na nzoto, bisakweli, makambo oyo elingaki kosalema, ata moko te ezangaki kokokisama! Sikawa, bózala mosika na ba-denomination wana, ezali komema bino na kufa.

³²⁵ Samwele atelemaki mokolo moko, balobaki na ye: “Tolingi mokonzi, tolingi kozala lokola baoyo mosusu na mokili.”

³²⁶ Bango. . . Samwele alobaki: “Bózua mokonzi te. Akozua bana na bino ya mibali, ná ya basi, mpe akosala *oyo* mpe akosala *oyo wana*.”

³²⁷ Alobaki: “Iyo, nayebi ete olobi solo.”

³²⁸ Kasi Samwele alobaki: “Bóyoka ngai. Nasílá kozua mbongo na bino? Nasílá kosenga-senga bino mpo na kobikela? Nasílá koyebisa bino ete bosengelaki kofúta ngai misolo boye mpo náteya na mayangani na bino?” Sikawa, bino moko bókáta ntina, ata sikawa! Bomoni? Alobaki: “Nasílá nde koyebisa bino likambo moko na Nkombo na Nkolo kozánga ete ékokisama?” Ata likambo moko te.

³²⁹ “Oh, iyo, Samwele, otikálá kosenga biso mbongo te, otikálá koluká naino biloko ya minene te. Samwele, ezali solo, mpe makambo nyonso oyebisaki biso na Nkombo na Nkolo ekokisamaki. Kasi, Samwele, ata bongo, tolingi kozala na denomination na biso!”

³³⁰ “Boye, bókende kozua yango. Etali bino.” Ya solo.

³³¹ Okoki kokanisa ozosalela Nzambe mosala, kasi soki obimi libanda na lolenge ya kosala ya Nzambe, okokóba kokotisa mobulu, mbala na mbala. E Lingomba ya Nzambe na bomoi! Nasengi na bino bólimbisa lolenge na ngai ya ba-Irlandais mpe lolenge na ngai ya kosekisa, kasi na bosembo mpe na bosantu ya motema na ngai, bino ba-Assemblée de Dieu, bino ba-Unitaire, ba-Presbiterien, ba-Methodiste, to soko banani bozali, bókíma mpo na kobatela bomoi na bino. Bómikanisela: bóbima kuna.

Mabota ezali kopanzana, Yisraele ezali kolamuka, (Bazali komilengela mpo na mwa bato wana.)

Bilembo oyo basakoli basakolaki;
 Mikolo ya bibongiseli etikali ya kotanga,
 etondi na nsomo,
 “Bózonga, E bapalangani, epai na bino.”

Mokolo na lisiko ebelemi,
 Mitema ya bato ezali kosénzwa na nsómo;
 Bótondisama na Molimo na Ye, bóbongisa mpe
 bóngengisa minda na bino,
 Bótombola miso! Lisiko na bino ebelemi.

³³² Bondimi yango? Tokómi na ntango ya nsuka, tokómi wana. Likomi ekomami na etutú, Boyei ya Mibale ekómi pene, Mwasi na libala azali koponama, komwangisama mai, kobimisama.

³³³ Sikawa, elingi koloba te, kobimisama na balosambo, kasi kobimisama na mimesano ya ki denomination. Bosengeli kokende na losambo, kasi bókóta na ebongiseli moko te. Yesu atambolaki elongo ná bibongiseli nyonso, kasi Akotaki na moko na yango te. Azuaki mpe ngámbo ya moko na yango te, ata moke te, kasi Azalaki katikati na bango. Kuna nde epai Pole esengeli kongengisama. Tikala esika ozali, wana ozali kongengisa Pole. Bomoni? Yango nde ntina oyo Nzambe azali kosalela bino. Mitema ya bato ezali na nzala, bóyebisa bango ete Yesu Klisto azali solo mpenza, kaka ndenge Azalaki lobi, Azali bongo lelo; mpe Akozala bongo libela.

³³⁴ Ekoki kosalema ete mobali to mwasi, ná bosembo nyonso, wana bazali kosala makasi mpo na kosalela Nzambe mosala, mpe bámema yango na ngámbo oyo esengeli te. Ná epakweli ya solosolo ya Molimo Mosanto likoló na bango, kasi bámema yango kokesene na mwángo ya Nzambe mpo na eleko wana, mpe bábebisi likambo yango mobimba. Sikawa, soki bondimi ete ezali Solo, bóloba: “Amen.” [Losambo balobi: “Amen!”—Mok.] Touti kotánga Yango. Babebisi likambo yango mobimba, na koyáká te na nzela oyo Nzambe abongísáki mpo na kosala yango.

Tóbóndela.

³³⁵ E lingomba, awa mpe na ekólo mobimba, bóyoka mosali na bino ya komikitisa na ntongo oyo. Bokolinga kosala yango? Bótala esika bozalaki, eleki mwa mibu, ntango likambo oyo ebandaki; sikawa bótala ndenge bomekoli ezui litómba na yango, mpe bamilió ná bamiliáre ya ba-dollar ekoti na bibongiseli. Bomoni? Kasi bazali kaka mosika na Liloba na Nzambe. Bandako minene ná bibongiseli, ezali te nzela oyo Nzambe atalisaka Molimo na Ye. Atalisaka Yango na Liloba na Ye, mpo na kopesa Yango bomoi. Mpe soki obongísámá mpo na Liloba yango kobanda mokili ebandá, Liloba moko na moko ekoya kofanda likoló na Liloba yango. Lokola cellule ya moto esengeli kozala te cellule moko ya moto, mpe oyo elandi ézala ya mbwa, mpe cellule oyo elandi ézala ya niáo; esengeli kozala ba-cellule ya moto. Kasi esengeli liboso kozala na cellule moko mpo na kobanda. Boye

te? Bóloba: “Amen.” [Losambo balobi: “Amen.”—Mok.] Ee, soki ezali cellule ya Liloba mpo na kobanda, ba-cellule mosusu ya Liloba ebongísámi mpo na kosala yango nzoto mobimba.

³³⁶ Bózala bana mike te, bobele na bolingo, kasi bózala mibali oyo bakóli, na oyo etali Molimo mpe na kokata ntina. Bino bókata ntina soki nayebisaka bino Solo to te. Bino bókata ntina soki Ezali Liloba na Nzambe to te. Bino bókata ntina soki oyo nde ntango oyo tozali kolobela to te. Bino bókata ntina soki makambo oyo elakámá. Sikawa, etatolami? Na makambo oyo moto ata moko te na mokili akoki kosala. Kasi Ekómi mpenza momesano mpo na biso, na lolenge ete tozali kotika Yango koleka mpenza pembeni na biso. Bózela, lingomba, bózela.

³³⁷ Soki moto moko azali awa na ntongo ya lelo, oyo ayebi Yesu Klisto te, oyo alóngísámá te, na ntongo ya lelo, masumu na yo nyonso ekolímwá, lokola osálá lisumu te, mpe olingi kozala bongo. . . mpo bómíkanisela, mokolo moko, ekoki kozala lelo, ekoki kozala na miniti mitano oyo ezali kolanda, kasi mokolo moko, motema wana ekotika kobeta. Mpe kati ya kati wana ekopumbwa, ekokende kotelema Liboso na Nzambe, mpo na kosambisama kokokana na oyo ozali kosala na Nsango oyo na ntongo ya lelo, kokokana na Nsango *oyo* ozali komona. Ezali te. . . Ezali ngai te, ngai nazali bobele momemi-maloba. Lokola micro oyo, ekoki koloba eloko moko te, soki ngai nalobi kati na yango te. Ngai mpe nakoki koloba eloko moko te, soki Nzambe alobi na nzela na yango te, kasi bomoni ete Nzambe atatoli ete ezali Solo. Olingi kozala Moklisto ya solosolo.

³³⁸ Sikawa, tozali na esika te mpo na kobenga bato na etumbelo, kasi kaka na mesa yango, esika ofandi. Esika yango etondi meke, bato baleki ebele. Nakoki kobenga bino na etumbelo moko te, etumbelo moko ezali awa te, mpo na kobenga bino na yango. Kasi etumbelo ezali na motema na yo. Okoboya kotika ete mwa kondimisama wana, ete “Yesu Klisto azali solo mpenza,” épusana pembeni na yo lelo mpe ébenga ndambo mosusu ya nzoto na Ye pembeni na yo, mpo Ápéma na elielo ya motema na yo? Soki Azali kuna te, okolinga kotombola loboko, lokola elembo epai na Ye, koloba: “Nkolo, tondisa ngai, tondisa ngai na Liloba na Yo mpe na Bozali na Yo, mpo nákoka kobika na nzela na Yo”?

³³⁹ Wana mitó nyonso egumbami, miso nyonso ekangami, na ekólo mobimba, bótombola maboko, awa na eyanganelo oyo ezali awa mpe baoyo bazali mosika; nakobondela mpo na bino. Yango nde nyonso oyo nakoki kosala, nakoki kotondisa yango te. Nzambe ápambola yo. Nakoki kotondisa yango te. Nzambe ápambola yo; ná yo. Nzambe nde akoki kotondisa yango. Nzambe ápambola yo. Maboko ezali kotombwama, awa na eyanganelo oyo ezali awa, na ndako mobimba. “Tondisa yango. Tondisa ngai, E Nkolo. Tondisa ngai.” Sikawa, na nsima, ngai. . . Matondi, ndeko mwasi. Matondi, ndeko mobali.

Nzambe ápambola yo. Na nsima, ngai . . . Nzambe ápambola yo, molingami ndeko mwasi. Yo. Nsima na . . . Nakanisi sikawa ete nazui bato ya bosembo mingi, baoyo bazali koluka kozala na yango, nalingi kotombola maboko na ngai elongo ná bino.

³⁴⁰ E Nkolo, kotika ata moke te ete náfanda kimia mokolo moko. Ntango nyonso, Nkolo, kotika te ete nátelema na likambo moko, tika ete náková kokende liboso, Nkolo, kino nákokisa makambo nyonso oyo Obongísá mpo na ngai kosala. Ata ekosenga ntalo nini, ata ekosenga motuya nini, ata matóngi, ata ekulusu ezali mpasi, nakomikanisela ekulusu oyo Yo omemaki.

Na bongo, nakomema ekulusu oyo ebúlísámá
Kino mokolo liwa ekokangola ngai,
Nde nakozonga na ndako, nakolata motóle,
Motóle moko ezali mpo na ngai.

Yesu asengeli nde komema ekulusu Ye moko,
Wana mokili ezali kotambola mpamba?
Te, ekulusu moko ezali mpo na mwana na Ye
moko na moko,
Ekulusu moko ezali mpo na ngai.

³⁴¹ Nzambe molingami, Liloba esili kopesama. Ekoki kozonga mpamba te, Ekozua esika na Yango na esika moko boye. Soki momboto esili kolónama, Ekomwangisa yango mai kino ékóla. Mpe moto moko te akoki kobótola yango na loboko na Yo: “Baoyo nyonso Tata apésá Ngai bakoya epai na Ngai, moto moko te akoki kobótola bango na loboko na Ngai. Tata na Ngai apésá Ngai bango liboso na kozalisama na mokili”; ntango miángo nyonso esilaki kobongisama, Yesu apesamelamaki Lingomba na Ye, Mwasi na libala na Ye.

³⁴² Libala ya lokuta ya mokili, na ba-denomination oyo. Oyaki mpe okufaki na mokili, Osíkolaki Ye, Olóngisaki Ye, Asálá mabe ata moko te, mpo na kobanda. Akangamaki kati na motámbo, mokúfi miso. Ndenge loyembo elobi:

Kala nabungaki, kasi sikawa nazuami,
Kalakala nazalaki na Laodikia, mokúfi miso,
kasi sikawa namoni.

Mpe ezali ngolu nde etéyá motema na ngai
kobanga,
Ngolu nde esílísá nsómo na ngai;
Ngolu yango emonanaki na motuya mingi
Ntango nabandaki kondima!

Mpe mai ya Nzambe ekitaki likoló na elimo na ngai. Nazalaki na mposa ya mai.

³⁴³ E Nzambe, na mwa etumbelo ya motema moko na moko oyo ezali awa mpe na ekólo mobimba, tika ete mai oyo euti na nse ya etumbelo ya Nzambe ésopana likolo na Lingomba na Yo na ntongo oyo; mwangisela Yango mai, Nkolo, mpo na eleko

oyo elingi kosila. Pesa Yango Bomoi, Mai ya Bomoi, mpo Ékoka kotikala Liboso na Mwana, mpo na kokomela, mpo na ebombelo na Yo ya nkembo.

³⁴⁴ Tata, nabondeli mpo na Yango. Kasi mobímbí esengeli kokauka, yango wana nakoki kobondela mpo na yango te; esengeli kokufa, na bongo esili kokufa. Kasi nabondeli mpo na Blé, Nkolo, oyo ezali kozua lolenge ya Nzoto ya Klisto. Sálá, Nkolo, ete mai ya sika ya Nzambe épolisa ntango nyonso matáma na Yango na mpisoli ya esengo mpe na lisosoli, kino masíni ya kobuka mbuma éyá kozongisa Yango na ndako. Na Nkombo na Yesu, natiki nyonso na maboko na Yo, Nkolo; mbano ezali ya Yo. Amen.

[Ndeko mwasi moko apesi nsango moko—Mok.] Amen.

³⁴⁵ Na bongo, Tata Nzambe, totondi Yo. Mpe, Tata, tobondeli mpo na ndeko na biso ya mwasi, mosali oyo, mpo na makasi na ye. Nazokanisa ntango oyo na—nakendeki kokutana na ye, ndenge Molimo ekitelaki ye mpe apesaki bobele nsango oyo Mwanje na Nkolo apésáká na Ebale mokolo wana: “Lokola Yoane Mobatizi atindamaki liboso na boyei ya liboso ya Nkolo Yesu, yo otindami mpo na kokamba liboso na oyo ya mibale.”

³⁴⁶ Wana tozali komona yango kozua lolenge sikawa, kokóma eteni ya blé, e Nzambe, totondi Yo mpo na nyonso oyo Osali. Tozangi maloba mpo na kotalisa ndenge mitema na biso etondi. Nazali komiyoka ete natondi mingi, Nkolo, nayebi te náloba lisusu nini. Kasi natondi Yo lisusu, Tata, mpo na nyosno oyo Osali mpo na biso. Na Nkombo na Yesu Klisto.

Nalingi Ye . . .

Tóyembela Ye, sikawa. Bóbósana te, Azali awa.

Mpo Alingaki ngai liboso
Asombi lobiko na ngai
Likoló na Ekulusu.

³⁴⁷ Esali ete bómiyoka moke malamú, mwa moke malamú mpenza? Botikali mpenza polele, bobele mi mpenza mpo na koyamba Molimo, bomoni.

Simba loboko na Nzambe oyo ebongwanaka
te!
Simba loboko na Nzambe oyo ebongwanaka
te!
Tongá elikia na yo likoló na biloko ya Seko,
Simba loboko na Nzambe oyo ebongwanaka
te!

Kolúla bozui ya mpamba ya mokili oyo te,
Oyo eumelaka na kobeba te,
Tongá elikia na yo likolo na biloko ya Seko, (Na
ebongiseli te, sikawa.)

Simba loboko na Nzambe oyo ebongwanaka
te!

Simba loboko na Nzambe oyo ebongwanaka
te!

Simba loboko na Nzambe oyo ebongwanaka
te!

Tongá elikia na yo likolo na biloko ya Seko,
Simba loboko na Nzambe oyo ebongwanaka
te!

³⁴⁸ Bato boni bazali koluka kosala bongo? Tombola loboko. Sikawa, sembola loboko na ngámbo mosusu ya mesa, bósimbana maboko bamoko na bamosusu, *boye*, elongo. Bokoki kofanda, ezali mabe te, to ndenge bolingi. Bóyoka malamú. Tóyemba yango elongo sikawa. Ezali kotalisa monyolólo na biso, oyo ekatanaka te, ya bolingo na Nzambe. Tosimbani maboko mpo tondimeli Nzambe. Tosimbani mpo tozali bandeko, ya mibali mpe ya basi, bobele Molimo yango, oyo ezali koningana, Liloba ya Seko ya Nzambe, oyo efandi na mitema na biso, ezali kotalisama.

Ntango mobembo na biso ekosila,
Soki tozalaki sembo epai na Nzambe,
Ndako na biso na Nkembo ezali kitoko mingi,
Bomoto na biso ya kati ekonétolama mpe
ekomona yango!

Simba loboko na Nzambe oyo ebongwanaka
te!

Simba loboko na Nzambe oyo ebongwanaka
te!

Tongá elikia na yo likoló na biloko ya Seko,
Simba loboko na Nzambe oyo ebongwanaka
te! (Molimo na Nkolo!)

Simba loboko na Nzambe . . .

Bókanisa bobele Ye, bomoni. Oyo nde lolenge ya mayangani oyo tosendeli kosala, na mikolo ezali koya.

. . . oyo ebongwanaka te!

Tongá elikia na yo likoló na biloko ya Seko,

Liloba ezali eloko bobele moko oyo ezali ya Seko.

Simba loboko na Nzambe oyo ebongwanaka
te!

Kolúla makambo mpamba ya mokili oyo te . . .
(Lokumu, mayele ya kelasi.)

Oyo eumelaka na kobeba te, (Bótala yango lelo,
ndenge esali.)

Luka kozua libúlá ya Likoló,
Oyo ekoleka soki moke te!

Simba loboko na Nzambe oyo ebongwanaka
te!
Simba loboko na Nzambe oyo ebongwanaka
te!
Tongá elikia na yo likolo na biloko ya Seko,
Simba loboko na Nzambe oyo ebongwanaka
te!

³⁴⁹ [Ndeko mwasi moko alobi minoko na sika, ndeko mwasi mosusu apesi ndimbola—Mok.] Totondi Yo mingi, Nkolo. Wana tozali na ntango ya motuya oyo, lokola liyangani ya matánga, mpo etikali moke tokokunda mokili oyo ezali kokufa, oyo ekufi; lingomba ezali kokufa, oyo ekufi.

E Nzambe, sangisa mbuma ya blé na Yo noki, Tata. Yaka noki, Nkolo Yesu.

³⁵⁰ Pambola bato na Yo, Tata, pesa bosembo mpe bozindo na mitema na bango. Tika tókoka kotíka mabína ya nsóni wana, tókota nde na bozindo ya bozui ya mafúta na nzói ya Nzambe. Sala yango, Nkolo. Kóbá koléndisa mitema na biso na bolingo ná bosembo.

³⁵¹ Pambola bato na Yo na bisika nyonso, Tata. Wana tozali kotika esika oyo, tókoka kokende na Nkombo na Nkolo Yesu, koloba makambo oyo ezali sembo, oyo ezali Solo, oyo ezali malamú, tika ete tókoka kokíma makambo oyo ezali mabe, Nkolo. Soki moto abandi kokosa biso, tókoka noki-noki kopesa ye mokongo, kopesa mokongo na máseki nyonso ya bosoto, ya mbindo mpe na makambo ya mokili, tópesa yango mokongo mpe tólongwa wana. Sunga biso, Nzambe molingami. Pesa biso lolenge, sala biso, buka-buka biso, mpe kómísá biso na elilingi ya bana na Nzambe, ya mibali mpe ya basi, mpo tókoka komikamba na nguya ya Molimo Mosanto. Tomipesi epai na Yo, wana tosimbani maboko, na Nkombo na Yesu Klisto. Amen.

Tótelema. Ndeko Nolan. 

65-1127B Komeka Kosalela Nzambe Mosala
Kozanga Ete Ézala Mokano Na Nzambe
Hotel Washington Youree
Shreveport, Louisiane U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org